

漢書門	
四七一	二
三六	函
四	架
六	九
冊	架

内閣文庫	
三三	四
函	七
六	一
九	二
架	架

内閣文庫	
番號	漢 49.2
冊數	69 ( 59 )
函號	362 69



綴じ部(喉部分)の文字など開きが不鮮明な箇所あり



文翰類選大成卷第一百三十七制誥目錄

唐

蘇廷碩 二道

李虞仲 一道

賈幼鄰 一道

李公垂 一道

李仁山 一道

白樂天 二道

宋

李太初 一道

王禹玉 四道

張方平 二道

蘇子瞻 十道

呂晦叔 一道

王介甫 六道

李邦直 二道

曾子開 四道

劉原甫 五道

胡武平 二道

司馬君實 一道

劉貢甫 二道

鄭毅夫 二道

元絳 二道

曾子宣 一道

梁燾 一道

蔡君謨 一道

歐陽永叔 三道

范景仁 一道

鄧潤甫 三道

蘇子由 四道

錢勰 一道

曾子固 二道

孫巨源 一道



呂陶 一道  
沈文通 二道  
元  
王震 二道  
鄒志完 一道  
張閣 一道

王之綱 一道  
姚端夫 五道  
元復初 二道  
張士觀 三道  
閻子靜 六道  
袁伯長 一道  
李端 一道  
李槃 二道  
虞伯生 一道  
吳幼清 一道  
霍希賢 一道  
劉元 一道  
盧亘 一道  
宋誠夫 一道  
程鉅夫 一道  
謝端 二道  
趙子昂 一道  
王構 五道  
楊果 一道  
鄧善之 一道  
王繼學 一道

文翰類選大成卷第一百二十七制誥目錄

文翰類選大成卷第一百二十七

左長史上海李伯



紀善慈谿馮厚校正

制誥類

唐

姚崇等北伐制

蘇廷碩

黃門朕聞上古聖王之政理則教之以戰陳之以兵蓋  
威不龔而服不順也故始於禁暴終於偃革斯不得已  
而用之朕以寡昧誕膺鴻業思欲率於動靜歸之教化  
豈要荒之外棄為匪人而亭育之中視則如子罔不遵  
我文軌修其貢賦歲時相望道路抵屬而默毀素稱桀  
驚鳴鏑於狼居頌目懷柔屢書於象魏朝廷所以許其  
通好議以和親使臣累齎繒帛侍子今襲冠帶庶中國



無事長城罷守戡干戈而銷劍戟者朕之意焉豈謂我  
盟不渝爾約斯背伊庭之際遂敢侵軼西北偏隅尚聞  
嘯聚雖摧其精銳而困於圍逼此不虞之失也朕甚憐  
之犬羊無親不可恃信而輕敵熊羆有勇咸能宣威而  
制勝朕由是詢卿士之奏攬英雄之心謀元帥而得佐  
軍恢遠圖而舉長策隨時之義其在豫乎兵部尚書兼  
紫微令監修國史上柱國梁國公姚崇天降其才日新  
厥德禮義為本居有四鄰謨猷是先生知千里以仲山  
甫之操管夷吾之能智湧泉而不窮精貫日而愈勵信  
廟堂之柱石鼎鼐之鹽梅必能奮爾六奇先我三傑可  
持節靈武道行軍大惣管管內諸軍咸受節度右領軍  
衛大將軍兼檢校單于大都護鎮守軍使張知運寬厚  
沈毅外方內直威而勇決自懾單于之臺悉則撫循咸

仰將軍之樹可中軍副大惣管權檢校原州都督李欽  
憲家承將相器兼文武求古人之節臨事不回讀前史  
之言好謀而斷可左軍副大惣管檢校左威衛將軍靈  
州都督呂休璟慣知邊要久探戎律誠期報國去病安  
用家為奮不顧身伯昭不持賊遺可右軍副大惣管左  
驍衛將軍論弓仁右金吾衛大將軍勿部珣左領軍  
郎將攝木衛將軍張直楷單于副都護臧懷亮右領軍  
衛中郎將王海賓前朔州刺史劉元楷右武衛郎將陽  
楚客并州定清府果毅元蕭然等頗牧為用關張其敵  
懷才倜儻嘗邀百勝之功立志經營備習九章之訓弓  
仁盡珣並可前鋒惣管直楷可左虞候惣管懷亮可右  
虞候惣管海賓元楷楚客蕭然等並可行軍惣管太僕  
少卿田崇璧鄜州刺史韓思復等強力從政精心在公



知無不爲利有攸往入敷事典省閣稱其閑練出綜條  
察使人畏其嚴明崇壁可兼行軍長史思復可兼行軍  
司馬兵部郎中李休光司勳郎中張敬忠兵部員外郎  
王上客刑部員外郎楊欽明江州別駕李邕等或特達  
珪璋所謂登壇之寶或翩翩書記曾聞及雷之詞可以  
光贊出車弘宣入幕並可行軍判官靈武軍兵加滿十  
萬人舊馬既少宜於內外閑廐抽壯馬添滿陸萬死原  
夏等州要害處亦量加馬其後軍兵六萬人馬二萬死  
先來點定宜令衛尉卿李延昌左羽林將軍楊敬述等  
至冬檢閱且當處團結待後進止其有先鋒破賊斬馘  
摧堅切効灼然者並委軍將便定功賞不須限以常格  
惣管以下有損失兵馬不能力戰棄軍逃命者便殺其  
有棄軍入賊不能死節者妻子依叛緣坐法凡此和衆

誓于師兵統燕犀冀馬之雄屯斬蛟絜鼉之勇鼓鼙沸  
野旌旗彗雲豈式遏於河塞方震驚於沙漠於是乎單  
醪以信之芳鉏以賞之戮揚干之僕必行其令持穰苴  
之兵不枉其法堅壁清野則投石而有餘追奔逐北則  
掃塵而無類俾權宜於關外仍布告於天下暫勞永逸  
在此行焉主者施行

授宋璟御史大夫制

黃門三台副職百寮之師紀綱是任莅事惟能國子祭  
酒上柱國廣平郡開國公東都留守宋璟含純粹之德  
稟清剛之氣學研精以辨政文體要以經遠吉人之寡  
敷言有訓君子之慎擇行無違正色而自貞陽秋立誠  
而不憊風雨必能靜專動直獻忠納規嘗聞沃心之任  
靡憚犯顏之情使其坐以鎮俗毅然當朝則不能者退



不仁者遠王臣蹇蹇懦夫有立俾光天憲式副人瞻可  
御史大夫勲封如故主者施行

授李暉宗正卿制

賈幼鄰

門下前弘農太守李暉體正心和操端行潔或政能茂  
異所蒞必聞或忠孝兼全避權勸讓咸推公議多負卿  
才官惟其人用必有適宜欽爾職以弼予教可守宗正  
卿

授張沛司膳少卿制

李巨山

鸞臺新除齊州刺史張沛禮義高族忠賢令緒才優識  
通學敏詞贍實蘊幹時之具雅懷在公之節絃歌出撫  
亟動於謳謠符傳所經必聞於課最允稱衣冠之胄是  
謂禋廟之珍三暑爲卿九流莫尚宜廻負海之駕俾登  
象河之列可司膳少卿主者施行

授崔群右僕射兼太常卿制 李虞仲

勅僕射貳令之職也奉常正卿之選也假中臺之極稱  
冠列寺之崇秩無此兼命必資重賞前荆南節度管內  
觀察處置等使銀青光祿大夫檢校吏部尚書江陵尹  
御史大夫上柱國清河縣開國公食邑一千五百戶崔  
群道合時中識通政本含五行之秀氣爲一代之偉人  
文學致名公忠蒞職清貞不撓方廉自持曩昇台階助  
我憲祖實著贊時之績用存經國之規周旋累朝揚歷  
大位出作垣翰入標羽儀風雨有不己之鳴雪霜無可  
變之色秉是全德固聞異詞乃者輟自夏卿授之戎閫  
統荆衡之巨鎮嗣羊杜之前聲政推洽平理在徵復禮  
樂之器予心所難冀流合雅之音將考依經之制慎簡  
斯久僉諧乃俞俾廻軍旅之謀式暢人祗之職伯夷官



葉佇乃脩明可檢校尚書右僕射兼太常卿散官勳封如故

授韓弘河中節度使制

李公垂

門下王者統馭萬寓緝熙庶政必有文武全器柱石之臣出壯藩岳入和台鼎使其効彰中外聲播華夷所居而人心自寧所莅而軍令自肅充是任者其惟至公開府儀同三司守司徒兼中書令上柱國許國公食邑三千戶韓弘受天地凝粹之氣得山川崇深之靈厚其體而壯其容虛其心而宏其量早洞戎韜之學久膺節制之權隱然大梁克有成積及功宣邊冠志展勤王懇申戀闕之誠竟遂來朝之禮位高百辟榮冠一時恩極而愈恭名光而益勵朕方欲樹以垣翰仗乎忠賢乃睽關河之首實惟股肱之郡自昔重寄無非元勳是用命以

上公復茲雄鎮於戲頃居東夏父子偕分闡之榮今處近郊伯仲並登壇之貴道苟積於忠實顧何愛於寵章往惟欽哉副我明命可守司徒兼中書令河中尹充河中晉絳慈隰等州節度觀察處置等使散官勳封如故主者施行

授韓愈比部郎中史館修撰制 白樂天

勅太學博士韓愈學術精博文力雄健立詞措意有班馬之風求之一時甚不易得加以性方道直介然有守不交勢利自致名望可使執簡列爲史官記事書法必無所苟仍遷郎位用示褒升可依前件

授薛存誠御史中丞制

勅庶官之政得人則舉況中執憲準繩之司所以提振紀綱端肅內外蓋一職修者其斯任之謂歟給事中薛



存誠選自郎署列于左曹居必靜專言皆讜正章疏駁  
議多所忠益可以執憲立乎朝端況副相方缺臺綱是  
領糾正百官爾得專之夫直而不絞威而不猛不附上  
而急下不犯弱而違彊率是而行號為稱職敬服斯命  
往其懋哉可御史中丞餘如故

宋

除呂蒙正中書侍郎兼戶部尚書平章事制

李太初

天道無私日月星辰助其照皇王不宰股肱輔弼代其  
工所以端拱守成垂衣制理永建丕平之景運遐追三  
代之今猷其有業茂經綸才推謹厚參大政而已淹星  
歲秉至公而無捨寅昏宜頒出綽之殊恩俾正持衡之  
重柄爰擇剛日特降命書推忠佐理功臣朝散大夫給

事中參知政事柱國東平郡開國男呂蒙正四氣均和  
五行鍾秀有濟時之略輔之以溫恭挺命世之才守以  
以循默爰觀舜旌之進善遂指魏闕以來儀臨軒觀政  
瞻之能射策見縱橫之略暨茲登用益著謨明公忠推  
社稷之臣凝重見廟堂之器眷茲大體久鬱具瞻宜宣  
作礪之功克懋秉鈞之績別錫褒切之美號仍陞馭貴  
之崇階勲籍增榮并田加賦預列侯之峻爵同大利之  
計書顧優恩之在茲諒名器之無假於戲雲從龍而風  
從虎今也其時啓乃心而沃朕心必求諸道爾宜周旋  
庶政佐佑眇躬緩茲宵旰之憂翊我隆平之運同底于  
道豈不美歟

韓通贈中書令誥

劉原甫

易姓受命王者所以徇至公臨難不苟人臣所以明大



節周故天平軍節度使檢校太尉同中書門下平章  
侍衛親軍馬步軍副都指揮使韓通定交霸府委質前  
朝荷戈共歷於艱貞錫壤迭分於戎律朕以三靈曠祐  
百姓樂推言念元勲方疇異渥蒼黃遇害良用憮然  
升浴鳳之池式表潛龍之舊

龍圖閣直學士兵部郎中涇原路經略使王素  
可諫議大夫誥

朕臨御天下賴宗廟之靈方內乂安元元蒙福而往者  
戎狄窺間緣隙時入為暴患皆在守圉之臣文不能附  
眾武不足威敵使貪暴之民震驚朕師具官王素假節  
剖符居邊三年內鎮撫百姓外教戰士令行禁止惠于  
鰥寡爰及疆外羈縻之虜咸懷服集不失朝貢中國以  
安朝廷益尊此蕃衛之勲也詩不云乎大邦惟翰 共議

遷秩升于諫列以慰使士出車東山之思

兵部員外郎張中庸可開封府判官誥

京師衆大之居其俗具五方而諸侯所視法也號稱難  
治蓋自古記之為之尹者專用擊斷則網密俗敝崇之  
以寬則威信不立故常擇精明疏通之人以參其職具  
官張中庸材劇而用博行脩而志堅處煩決疑必有餘  
裕俾贊浩穰之政當適寬猛之中根本之地爾惟欽哉  
屯田員外郎胡揆除都官員外郎

朝廷鎮撫四夷以綏中國貴於息民而不務佳兵故常  
申救邊吏毋邀奇功五嶺以南蠻夷雜居其俗悍尤  
為易動而桂州一都會也前通判軍州事尚書屯田員  
外郎胡揆承用詔旨悉心疆事終揆之任恬然無慮亦  
可謂善吏能宣明威信者矣夫守邊之患常在見小利



而不達大體以侵道驅奪之為故至大沸貽憂吾民則若揆者不可以不賞也稍增其秩以示褒寵

度支郎中李碩可三司戶部判官

財賦大計一出於民取之寡則用不足然而民逸取之多則用有餘然而民困此三司之難也術不能通輕重智不能調盈虛則吾不以為之僚具官李碩嘗以名字與郡風采奉使敏以為政精於檢下所到而治有迹可紀使之參計耗登贊舉籌策庶可以不傷財不害民乎往即會府母乏乃事

張鼎之可光祿卿致仕誥

蔡君謨

朕於群臣進退之際曷嘗不臆然思之方其強仕發智能以濟務則有官賞以懋其材遠其謝歸養志意以自佚則有恩渥以寵其行仕宦者豈不雍然得其所耶具

官張鼎之立節清峻無淄磷之苟臨事明敏有批導之利恤民以惠屏奸以嚴循吏之風聞于當世自并禁迹之列屢委宣藩之重服老聃之言而知止躡濼廣之迹而告老爾其還上官事秩以列卿休于而家尚體朕意

除韓琦依前同中書門下平章事進封儀國公

加食邑實封制

王禹玉

朕按奉高之儀思承上帝之福詠我將之什知配文王之切誦辰季秋之良盡志孝饗之事應一郊之定卜躬三歲之宗祈于時陳物采於國中接神明於堂上璧玉溫潔案盛今芳靈光燭於大庭休氣蒙于重宇疇相丕祀於顯元臣肆膺拜昨之釐首布告廷之命具官韓琦命世發德佐王矢謀財萬化於物宜熙百工於帝載已任沈機之斷力陳遠馭之圖若歲為霖可以濟天下之



早如易占筮可以判天下之疑責大而智愈深事昭而精猶勉迺先庚之詔靡物備而不嚴維自昔之文或禮闕而不講使朕得裒六天之對款七廟之靈輯于昭曠之儀顧匪烈文之輔茲庸錫之名壤建爾上公寔廣奉田之腴復敦真食之賦汝為汝聽汝勞汝嘉於戲在福不敢康蓋天有難忱之命於德如弗及蓋民無常懷之心雖朝廷之甚休益君臣之相勅宜興盛治允答靈歆

除文彥博樞密使賜功臣制

天極還樞上通帝位之紀神兵會府內嚴師律之謀朕方垂講不平進經常武雖天下無事思備禦之不敢忘蓋王者有征視安危之不敢忽適登髦傑資以輔予具官文彥博器閎而深材敏以濟早責賢人之業實膺聖考之知以忠孝之名形國家之盛節以文武之略輯

將相之大猷肆纂命於皇圖迺離憂於喪紀迨終哀戚甫見儀刑屬疆事之方興煩師旌之載舉折衝境外方將出憺於王靈收畫幄中曷若坐圖於廟勝宜長機廷之務亶符巖石之瞻於賊過餌北戎未厭貪驕之志再盟西夏猶苞狂忽之圖終佇奇勲用恢遠馭

除富弼依前同中書門下平章事充武寧軍節

度使判河南府兼西京留守司事仍賜功臣制三代處中以裁萬物之化四嶽總外以牧黎民之蕃如山河之經九州如股肱之衛一體出處之際朕無聞然具官富弼復貫有元蹈中弗勉學幾聖而獨至識造物之未形貴名起於三朝盛德儀于百辟鄉召從於列屏俾進翊於冢司為日尚新何恙靡已未及經升之務遽陳避位之辭詔雖屢而莫回章甫卻而復至朕憮然自



念嗟莫能勝既閔勞於政機其聽遂於私佚建彼徐節以殿東郊守茲洛符以保西宅仍位鴻鈞之貴尚優黃髮之行於戲不處成功專老氏榮名之畏其旂元吉要義經履道之終雖弗從於吾遊亦自保於而福

三司使禮部侍郎田況可樞密副使

天文三階中躔紫極之輔國事二柄右列鴻樞之司維君臣之謨明有夙夜之基命朕當登進時傑贊襄大猷以導萬微之中以合九德之會匪至公之進曷群聽之歸以爾具官田況器懷閑深業履端厚材適國家表裏之體學貫天人精稔之交而自高賢用於大廷儀峻遊於清路西垣名命之粹內閣論思之勤擁帥節于邊而天聲憺於殊俗筦財柄于內而國用豐於歷年茲庸倚爾忠力之良置諸宥弼之地熙我大業垂之亡窮噫本

天下之兵莫重安危之寄在帝右之陟有若臣鄰之榮蓋德懋者寵所隆任大者責亦至勉思盡瘁永克承休

除曾公亮檢校太尉充樞密使制 胡武平

經遠慮微必慎制兵之術折衝消難亦資畫策之臣是憲樞躔聿崇使號蓋政謨之攸寄匪耆哲而莫居適得其人誕敷厥命具官曾公亮夙業碩茂志慮深純學多貫於前言性頗修於中道有方重之德可以扼躁而鎮浮有明達之材可以造幾而成務嘗講勸於左右亦召置於禁嚴博我訓言代予明命聞請臨於橐輔遙擢典於京師咸有治功遂聞政本通明練於百物參和穆於群言貳公之司久陪於論道內密之任宜正於筦樞仍加傳導之名更益陪敦之數崇階馭貴真食衍封並示寵章式旌殊禮於戲典機之任莫慎乎微擊柝之言蓋



取於豫勿謂承平之久益思備禦之深祗服斯言往踐乃位

王元可右衛大將軍遥郡觀察使誥

閫制之師蓋威於不若巖除之衛乃備於非常唯中外之迭更在倚毗之兼厚具官王元可資沈敏節尚剛嚴少厲武鋒博通軍志幹方授任政屢服於蕃方厭難折衝功實施於邊境眷言雍部控于西州委以牙爪之師屯乃襟喉之地苛慝不作部分有嚴閱牘奏之爰來敘足腓之微苦願寘環衛乞朝京師須藥石之有瘳雖金重而無避忠言可壯誠實不誣朕以拱扈之嚴當資於宿將察廉之任用寄於舊勳遙總十連聯司二衛式表疏恩之數且伸從欲之仁惟忠力之是圖亦威名之斯賴體茲優遇更竭乃誠

除文彥博判大名府制

歐陽永叔

朕惟將相之崇資是為文武之極選隆其名器所以重朝廷列于蕃宣所以屏王室矧乃居留之任必屬老成之人爰擇剛辰敷告有位具官文彥博器閎而厚識粹而明學得其方通古今而知要才周於物適大小以惟宜自奮發於聲猷早更揚於中外居則參禪乎國論出則宣揚乎皇威兩踐台司首當柄用賢愚式序舉百職以咸修綱紀甚明贊萬幾而至悉自懇辭鈞衡之任出司管鑰之嚴逮此逾時蔚然休問眷言邦摺質簡予衷是用更其擁節之榮委以別京之重勁兵所宿寔資總制之權雅俗惟淳兼賴撫綏之政於戲與國同體是謂股肱之良惟民具瞻方隆師尹之望顧我舊德豈煩訓辭往其欽哉祗服休命



西京左藏庫使內侍押班任守信可選郡刺史  
依舊鄜延路駐泊兵馬鈐轄誥

國家自靈夏不賓邊隅多警議者率以謂用兵之道任  
將宜專恩信不又則無以得士心山川不習則不可圖  
勝筭自兵猶于野久而無功此殆將帥數易之患也苟  
有能者無據奪焉以爾具官任守信選以敏材臨于戎  
車肅軍捍寇宣力有聞遽以飛章自言滿歲顧久親於  
矢石豈不念於勤勞然而士卒之樂旣汝安夷狄之情  
惟汝熟雖欲代汝實難其人所宜旌以郡章仍臨舊部  
體茲委寄服我茂恩

彰武軍節度推官李仲昌可大理寺丞簽署渭  
州判官事誥

群材之在下者思達其上難矣而在上者思得可用之

材豈為易哉朕頃自擇能臣使舉其類而洙以爾充薦  
今琦又以為言琦洙皆能體吾勞於擇士之心者舉爾  
不應不慎霈然推寵吾所不疑爾尚勉哉以稱茲舉

除呂公弼樞密使檢校太傅制 張方平

本朝之制地分二府之嚴執政之臣共幹庶邦之重文  
武承式兵民是圖屬在賢明總司使職誕敷明制敷告  
大廷具官呂公弼器縕純明機靈精遠環材任重中廣  
厦之棟梁雅音自和合清廟之琴瑟登貳樞機之密洽  
聞議慮之長屢陳憂國之言多發便時之策深明王體  
有簡朕心宜陞帝傳之崇以正本兵之任爰田增賦真  
食衍封名器益隆典章允穆於戲信而能用嘗思明括  
之難知無不為期盡臣鄰之益祇若休命以贊大猷

除李昭亮殿前副都指揮使寧武軍節度使制



外擁節旄方鎮元戎之重內司禁衛太徽上將之雄匪  
時英材疇若嘉命圖用親率宜揚大廷其官李昭亮誠  
稟忠淳風力敏給世載其德有孤趙之積勲文定厥祥  
迺委任之高姓早階華顯允陷中和入從法從之華出  
領翰垣之要屬以軍政契于士心訓撫有方簡稽允  
肅眷殿巖之離衛悉王旅之選鋒典茲中權職在圻父  
特賜節旄之命爰將注意之隆峻以等威統諸環列於  
戲齋鉞所付是為王之爪牙蘭錡之嚴實曰予之心膂  
勲旃誠報茂對寵休

河北都轉運使工部郎中張昱之可兵部郎中  
充天章閣待制三司戶部副使誥

唐自開元以還王室多故行在之所不能備官而從軍  
興之期顧多應卒之事爰從權便置諸使而天下庶政  
始不歸於尚書省今之會府乃在三司蓋自中臺至于  
寺監之務凡關出納無不總者故建其長以始要立其  
貳以治凡設其攷以治目以言乎三司之副是猶文昌  
之丞轄助上率下舉綱振日常出高選以贊大計具官  
張昱之才識器用政事風采稱于朝廷著于方面今邊  
候多警戎車未脫凡物力之充屈繫生齒之耗登職司  
版圖必藉精力故謀于眾還爾外臺尚悉乃心以集吾  
事

祁國長公主進封衛國長公主制 司馬君實

帝妹中行易象贊其元吉王姬下嫁召南羨其肅雍命  
服亞正后之尊主禮用上公之貴寵光之盛誰昔而然  
矧同氣之至親推異數而何愛祁國長公主席靈長之  
緒承濬拓之祥稟乾坤之粹和鍾日月之明潤淵懿可



度柔嘉有章志女功而忘勞承師教而不倦今王笄在首厭翟戒塗方結悅於皇家將執笄於士族宜疏沫土之色俾適富平之孫庸展茂恩誕孚醲化於戲琴瑟靜好式昭和樂之音雷風順承是爲常久之道勿以夫家之平素有虧婦德之聽從祇服訓詞永綏福履

充國公主降沂國公主制

范景仁

陳車服之等所以見王姬之尊啓脂澤之封所以昭帝女之寵茲惟親愛之攸屬時乃化風之所關苟不能安諧於厥家則何以觀示於流俗充國公主生而甚惠朕所鍾憐故於外家之近親以求副車之善配而保傳無狀閨門失歡歷年于茲生事弗順達於聞聽深所駭驚雖然恩義之常人所難斷至於賞罰之際朕安敢私宜告大庭降從下國於戲惟肅雍以成美德惟柔順以輯令名乃其恪思庶永來福

除呂公著守司空同平章軍國事制

蘇子瞻

仁莫大於求舊智莫良於用衆既得天下之大老彼將安歸以至國人皆曰賢夫然後用今朕一舉仁智在焉宜告治朝以孚大號金紫光祿大夫守尚書右僕射兼中書侍郎上柱國東平郡開國公呂公著訐謨經遠精識造微非堯舜不談昔聞其語以社稷爲悅今見其心三年有成百揆時敘維乃烈考相予昭陵蓋清淨以寧民亦勞謙而得士凡我儀刑之老多其賓客之餘在武丁時雖莫追於前烈作召公考固無易於象賢而乃屢貢封章力求退避朕重失此三益之友而閔勞以萬幾之煩是用遷平土之司釋文昌之任母廢議論時遊廟堂於戲大事雖咨於房喬非如晦莫能果斷重德無逾



於郭令而裴度亦寄安危罔俾斯人專羨唐世

除范純仁太中大夫守尚書右僕射兼中書侍

郎制

朕惟朝廷之盛衰常以輔相為輕重若根本彊固則精神折衝故為呂臣奉已而不在民則晉文無復憂色汲長孺直諫而守死節則淮南為之寢謀朕思得其人付之以政使天下聞風而心服則人主無為而日尊咨爾在廷咸聽朕命中大夫同知樞密院事上柱國高平縣開國伯賜紫金魚袋范純仁器遠任重才周識明進如孟子之敬王退若蕭生之憂國朕覽觀仁祖之遺迹永懷慶曆之元臣強諫不忘喜臧孫之有後戎公是似命召虎以來宣雖兵政之與聞疑遠猷之未究坐論西省進貳文昌增秩益封兼隆異數於戲時難得而易失民

難安而易危予欲守在四夷以汝為偃兵之姚宋予欲藏於百姓以汝為息民之蕭曹勉思古人以稱朕意

除呂大防太中大夫守尚書左僕射兼門下侍

郎制

朕聞天子有道其德不可得而名輔相有德其才不可得而見故漢之文景紀無可書之事唐之房杜傳無可載之勲當時安榮後世稱頌予欲清心而省事不求智名與勇功天維顯思方啓承平之運民亦勞止願聞休息之期眷予元臣咸有一德咨爾百辟明聽朕言中大守中書侍郎上柱國汲郡開國公賜紫金魚袋呂大防造道淳深受才宏毅果藝以達有孔門三子之風直大而方得坤爻六二之動久踐右闈蔚為名臣宜陞左輔之崇兼綜東臺之務加賦進秩寵數益隆得位與時



憂責彌重於戲若古有訓無競維人崔公建中之風以  
除吏八百而致裴均元和之政以薦士三十而能惟公  
乃心何遠之有

鮮于侁可太常少卿誥

奉常之職非特以治郊廟之度服器之數而已國有大  
政事大議論必稽焉昔魯秉周禮齊不敢謀而晏子太  
師折衝於樽俎之間國之典常君臣之名分上下守之  
有死不易則國安而民服朕選建卿士付之禮樂意在  
於此非我老成之人學足以通古才足以御今智足以  
應變彊足以守官深於經術達於人情其孰宜之詩不  
云乎彼其之子邦之司直往修厥官無斃朕命

楊繪可知徐州誥

士有拙於謀身而巧於治民踈於防患而密於慮國其

自為計則過矣而朕何疾焉先帝龍興首擢用爾置之  
臺諫以直諒聞言雖無功效於今日簡易輕信失之匪  
人坐廢十年陶然自得詩人所謂豈弟君子者繪庶幾  
焉彭城大邦吾股肱郡政成民悅朕不汝忘

楊王子孝騫等二人荆王子孝治等七人並逐

州團練使誥

先皇帝篤兄弟之好以恩勝義不許二叔出居外蓋  
武王待周召之意太皇太后嚴朝廷之禮以義制恩始  
從其請出就外宅得孔子遠其子之意二聖不同同歸  
于道可以為萬世法朕奉侍兩宮按行新第顧瞻懷思  
潛焉出涕昔漢明帝問東平王家何業為樂王言為善  
最樂帝大其言因送列侯印十九枚諸子年五歲以上  
悉帶之著之簡策天下不以為私今王諸子性于忠孝



漸于禮義自勝衣以上頎然皆有成人之風朕甚嘉之  
其名進一官以助其為善之樂尚勉之哉母忝乃父祖  
以為邦家光

韓維父億贈冀國公誥

朕聞仁宗在位之乂有同成康得士之盛不減武宣如  
儲藥石以待疾病如種梓漆以備器用凡今中外文武  
之選率多慶曆嘉祐之人而况一時之老成與聞當年  
之大政德業傳於父老儀刑見於子孫名在國史像在  
原廟朕用慨然相見其人具官韓維故父億少稟異材  
進由直道出為循吏入為名卿福祿終身而人不疵富  
貴奕世而天不厭實生三子翼輔兩朝旌旄交馳榮戟  
互設朕欲賁其家廟而貴已窮於人爵改封大國益著  
隆名庶使昭陵之老臣永為北土之藩輔

呂惠卿責授建寧軍節度副使本州安置不得  
簽書公事誥

元兇在位民不奠居司寇失刑士有異論稍正滔天之  
罪未為垂世之規具官呂惠卿以斗筭之才挾穿窬之  
智諂事宰輔同升廟堂樂禍而貪功好兵而喜殺以  
聚斂為仁義以法律為詩書首建青苗次行助役均輸  
之政自同商賈手實之禍下及雞豚苟可蠹國以害民  
率皆攘臂而稱首先皇帝求賢若不及從善如轉圜如  
以帝堯之心姑試伯鯨終然孔子之聖不信宰予發其  
宿姦謫之輔郡尚疑改過稍畀重權復陳圖上之言繼  
有陽山之貶反覆教戒惡心不悛躁輕矯誣德音猶在  
始與知已共為欺君喜則摩足以相歡怒則反目以相  
噬連起大獄發其私書黨與交攻幾半天下姦賊狼藉



橫被江東至其復用之年始倡西戎之隙妄出新意變  
亂舊章刀引狂生之謀馴致永桀之斷興言及此流涕  
何追迨予踐祚之初首發安邊之詔假我號今成汝詐  
謀不圖渙汗之文止為款賊之具迷國不道從古罕聞  
尚寬兩觀之誅薄示三危之竄國有常典朕不敢私

李之純戶部侍郎誥

保國猶保身藥石不如養氣御民猶御馬鞭箠不如輕  
車故興利以富民不如省事而民自富廣求以豐國不  
如節用而國自豐朕嘉與庶工共行此志具官李之純  
屢試以事號稱循良雖為有司不吝出納宜膺躡等之  
用庶無虛授之譏服我訓詞以厭公議

謝卿材陝西轉運使誥

治邊者不計財惟邊之所用治財者不卹民惟財之為  
富此古今之通患也朕知汝才智可倚忠厚可信故以  
西方之政責成於汝往與師守者謀之惟適厥中以民  
為本

殿中侍御史豐稷可右司諫誥 劉貢甫

在廷之臣位下而望重者唯諫官而已為其得廟切人  
主紀綱國體也然非其學足以達道其智足以周務見  
微而知著擇善而有容亦安能稱其事而宜其官哉以  
稷自居憲府綽有士譽名不虛得材實允副移珥筆之  
權當伏蒲之選讜言正色迺其素守吐剛茹柔毋愧前  
哲則我為知人爾號稱職矣

吏部侍郎胡宗愈可御史中丞誥

權衡之於輕重繩墨之於曲直由其無私而素具是故  
應物而不貳朝廷風憲之任忠讜之士亦所以素具而



待列位也命官之艱得人惟允具官胡宗愈秉心端直  
為學深厚粹然特達之姿淵如有容之度學自潤色綸  
省獻納瑣闈副貳天官藻鑑多士綽有休譽舉為稱職  
是宜付中司之權寄執法之柄爾其修習中之誠應方  
來之務有節於內則物無不察以義自處則動無不中  
稱此茂恩著為顯效

文彥博平章制

鄧潤甫

師傳道之教訓先王所以迪厥官老成重於典刑天下  
所以資其智迺眷舊德時謂元勳謀合祖宗之心名載  
鼎彝之器申放贊策播告外朝河東節度管內觀察處  
置等使守太師開府儀同三司太原尹致仕上柱國潞  
國公文彥博敦大而清明方嚴而信源出則秉乎旄鉞  
入則總我鈞衡文武兼備其才夷險能致其力畢公之

弼四世三紀于茲傳說之總百官萬邦其又爵隆無富  
溢之累名遂有身退之榮神明相其壽康人心想其風  
采是用還之論道倚以經邦以帝者之師臣謀議廊堂  
之上以天下之大老制馭夷狄之情庶幾為有底于極  
治陪敦多并申衍真封於戲呂望惟賢起佐文王之治  
周公已老留為孺子之師矧我耆英無媿前招徃宣一  
德用格多盤

立皇太子制

建儲非以私親蓋明萬世之統主器莫若長子茲本百  
王之謀朕荷天地之況臨席祖宗之詒燕迺睠上嗣之  
貴蚤應前星之祥宜告大廷誕揚丕號皇于彰武軍節  
度正州管內觀察處置等使檢校太尉開府儀同三司  
持節都督延州諸軍事延州刺史上柱國延安郡王溫



文日就睿智夙成回馳道之車能止班輪之驚辨南陽  
之牘允符東海之休自疏錫於王封益光華於德望勝  
衣相膳温然孝友之姿好禮受經不煩師傅之誨是用  
歷盛陽之嘉日舉列聖之大章肇正青宮肆敘顯冊以  
協離明之吉以係天下之心於戲立愛始親商以成十  
歲之業建嗣必子漢以撫四海之民斯為永圖社膺徽  
典

除司馬光左僕射制

帥群臣宿道而嚮方在慎取相佐王者脩政而美國莫  
若求人顧惟眇躬獲嗣大統儲思業業不敢忘六聖之  
休注意賢賢將以總萬方之治褒進上宰敷告外庭正  
議大夫守門下侍郎司馬光受材高明履道醇固智足  
以任天下之重學足以知先王之言逮事厚陵編儀侍

從之列被遇文考擢總樞機之繁有大臣特立之風蹈  
君子難進之節方予訪落之始起應兼均之求調娛萬  
幾必先教化之意辨察百職不失禮義之中是用諮  
僉言褒加異數越陞左揆之路兼峻東臺之班申衍爰  
田陪敦真食於戲上寅亮於天心則陰陽風雨以之順  
下遂宜於物理則山川草木以之寧內阜安於兆民外  
鎮撫於四裔蓋輔相者為之基杖而老成者重於典刑  
勉行所聞以底極治

除富弼尚書左僕射充觀文殿大學士集禧觀  
使制  
呂晦叔

聖王賦祿所以崇德而勸勞賢者辭隆所以激貪而厲  
俗眷我外相惟時宗工願還重紱之榮蓋露累章之請  
既重違於悃幅宜特示於褒優載揆剛辰式敷渙號推



誠保德崇仁忠亮佐運翊戴功臣武寧軍節度徐州管  
內觀察處置等使開府儀同三司檢校太師同中書門  
下平章事行徐州大都督府長史上柱國鄭國公富弼  
體資忠亮譏蘊淵閔炳嶽瀆之粹靈挺棟甍之厚器光  
輔仁祖蔚為文武之師迨事先皇實總機衡之要引疾  
遽辭於大柄均勞式殿於近邦未移巖石之瞻併及洪  
河之潤肆予續紹尤渴儀刑雖體力之未平顧風猷之  
克壯而乃過持冲守深遜寵名諭言已周誠意彌確朕  
惟安危所寄雖賴老成之人指益有規宜伸大雅之志  
俾進班於左揆聽復節於中臺仍總領於殊庭竚論思  
於秘殿用彰寵數蓋示眷懷於戲進止不膠共扶於名  
義幽明有相終昇於壽臧風於四方時汝之德

除富弼依前尚書左僕射兼門下侍郎同中書

門下平章事昭文館大學士兼譯經潤文使鄭  
國公制 鄭毅夫

秉錄膺圖將繼配天之犬業銓時論道必資名世之元  
臣以言乎體貌則舊德之英以言乎望實則群材之表  
爰立作相宜莫如公丕昭寵數之殊字告治朝之聽具  
官富弼智資大雅德懋碩膚學足以造聖人之微幾足  
以通天下之變繇賢科之得雋據遠業以奉功在仁祖  
時則首冠廟堂有弼諧九德之美在英考世則再登樞  
府有折衝萬里之謀庶績已熙太平將洽屬留侯之多  
病容裴度以為藩愷悌所宜神明自復方王家之不造  
固賢者之有為昔居畎晦而志猶在於愛君今處朝廷  
而義豈忘於憂國是用召從方守進拜元台仍左揆之  
舊班兼東臺之茂秩爰田衍賦盟府易勲茲實異恩庸



昭注意於戲上理乎天工則日月星辰以之順下遂乎物宜則山川草木以之蕃近則諸夏仰德以承流遠則四夷傾風以待命凡予欲治惟爾責成勉盡嘉猷用光丕訓

戶部副使太常少卿燕度可右諫議大夫知潭

州誥

湖湘之南溪蠻剽悍而易擾陸而馴之則亦強伏至其失御遂出而鬪邊其禍亦不細得無肅又廉治之帥為之良牧者哉以爾具官燕度醇明忠厚通於世務更存要劇芒刃愈出俾副大農厥功茂焉宜加賜諫議大夫魚符犀節往甸南服內以惠斯民外以柔殊俗朕方端展面朝以遲爾之奏課矣

除文彥博太師河東節度使致仕制 蘇子由

周公未嘗之魯老亦居豐留侯晚雖彊食終不任事蓋委寄之重初無閒然而止足之風所不敢廢惟我耆舊歷事祖宗纘服之初復命以位雖師保之地優佚不煩而立樊之心朝夕以請布告在位俾聞高風太師平章軍國重事上柱國潞國公文彥博克孝而忠允文且武其在師旅有方召之勲其在朝廷有崇環之業士民視其去就夷狄震其威名時更四朝躬蹈一節先皇帝愍勞以事既許其歸越予訪落之年凜有涉淵之志起之既老待以仰成出入五年終始全德進而論道日聞典訓之言倚以折衝卒靖邊防之警委成功而不處指莫景以求安動請屢聞誠心莫奪顧瞻閭井近在洛師郭氏有未卷之嚴裴公有綠野之勝豈以簪紱之累久致形氣之勞貴極上公既無復加之爵秩分領金晉仍昇



父還之節旌增廣舊封益衍真食殫盡人臣之寵歸從  
父老之遊於戲音聲不遐尚有就問之禮几杖以俟復  
期親視之陪勿以進退之殊而廢謀猷之告式燕且譽  
俾壽而康

蔡確改知安州誥

朕體貌大臣務全終始有善則藩飾褒顯以風厲天下  
有過則遷就諱避以曲全舊恩至於用去蓋不得已而  
具官蔡確早以才力奮於下僚旋蒙器使致位元宰第  
碩不類貪冒有素而溺於私愛以廢公議曲從奉使之  
請遂成贖貨之辜其驕奢淫縱之狀理無不知而涵養  
蒙蔽之甚殆非體國致煩言之並作雖欲宥而不能黜  
守小邦仍褫舊職往自循省尚體至恩

郭逵自致仕起知潞州誥

秦伯復用孟明是以能霸蜀人亟誅焉謬終亦無功朕  
周於用人篤於求舊雖設干羽以懷柔異類而聽鞀鼓  
則無忘將臣豈其舊勲久廢不用具官郭逵蚤學弓劍  
晚通詩書勇而有謀整且能暇威名懾於西鄙柄任及  
於中樞南伐無成嗟伏波之遂棄退居能飯知廉頗之  
未衰擢從解組之餘復寄長民之任過而能改豈一管  
之足云窮當益堅或來功之可靠勉於圖報以稱異恩

范鎮侍讀太一宮使誥

為國無強於得人用人莫先於求舊朕歷選賢俊至於  
側微惠其德望之未充而典刑之未練舍騏驎而不御  
臨長道以咨嗟人皆病之予何疑者具官范鎮文冠多  
士有揚雄之遺風仕歷三朝守劉向之忠節蚤事仁祖  
首開社稷之言晚說裕陵復陳堯舜之道自處以義歸



不待年身友漁樵已無求於當世名書簡用恍或疑其  
古人茲予續服之初日思講議之益謂白首窮經之樂  
尚可推以與人而真祠訪道之遊足使退而養志勉徇  
予意毋留所安

待制司馬光可禮部郎中制 王介甫

敕左右侍從之臣皆先帝所遺以助興政理者也有勞  
可錄朕敢忘哉具官某行義信於朝廷文學稱於天下  
比更任使會課當遷進位二等以嘉爾績爾方以經術  
入侍而又兼諫諍之官往其思致厥身使朕之聰明無  
所不通爾亦維有無窮之聞可

李日尊加恩制

朕紹膺駿命稽用上儀祗事郊宮並受三神之福推恩  
方夏外交四表之歡告于有司錫是在服推誠保節同

德守正順化翊戴功臣靜海軍節度觀察處置等使同  
中書門下平章事李日尊躬懷德善世濟忠勤奠茲南  
邦居有扞城之效衛我中國使無疆場之虞賜之大將  
之旄胙之真王之爵往踐厥位知欣戴於寵章來獻其  
琛用協成於熙事陪敦采邑褒進文階載加真食之封  
式允懋功之典於戲人之所助惟怙冒於王靈國以永  
存顧循守於侯度率時新命保乃舊邦

左司諫王陶可呈子伴讀誥

自天子至於士未有不待學而成者今朕欲進諸子於  
學求可與居者而大臣以爾爲言爾又在諫垣有聞於  
世茲惟慎選可不勉哉

崔嶧刑部侍郎致仕誥

仕焉而告老者自一命以上必有以慰其歸况吾邇臣



恩紀所厚宜增位序以示褒優以爾具官崔嶧此以明  
揚父於煩使入參侍從出備藩維踐更滋多寄屬惟允  
引年辭位得禮之宜進貳秋卿以榮居息古之士者非  
苟自佚其身唯慎行祇法以助成王德爾所知也往其  
懋哉

參知政事歐陽脩曾祖某贈某官

君子善善之義下及子孫况推而上之至其祖考所以  
褒美崇寵顧豈可以不稱哉故先王宗廟之制視其爵  
位之高下以為世數之遠近而本朝追命之禮亦從其  
子孫名數之卑尊具官歐陽脩曾祖潛于丘園躬有善  
行畜積之慶施于曾孫為時宗工名重天下圖仕以登  
于右府褒嘉當及其前人東宮之孤位已顯矣進秩一  
品尚其享哉

曾祖母某氏某國太夫人

尊之欲其貴親之欲其富豈特人主有是心哉推是心  
以施於人此人主所以與天下同憂樂之意也祿有厚  
薄故禮有隆殺位有高下故施有遠近古之道也其可  
忘哉具官歐陽脩曾祖母含德在躬作嬪令族積善之  
慶覃其後昆惟時聞孫實朕良弼登豫政事人無閒言  
其疏大邦之對封以報流澤之施寵維靈之極尚克享  
哉

除韓琦京兆尹再任判大名府制 元絳

分陝稱伯召南當公職之尊啓媿就封畢萬得國名之  
大况吾元老為世宗臣久倚帥垣之嚴宜遷尹節之寵  
飭宣典策敷告搢紳具官韓琦道醇而深器遠而博渾  
渾忠孝之業憲憲文武之姿感通仁朝亮眾采於台極



翼戴英考捧大明於天衢肆朕續圖厥初謀落燮諧四  
氣之序熙輯百官之成登昭公槐奔洩國社鎮定大事  
安如九鼎之安承寧諸侯端若元龜之信歲勤再閱師  
律既和重念郊圻之雄旁據河山之險徒得君重以宣  
王靈就更西雍之旌留主北門之鑰載敦爰賦并實幹  
封於戲漢咨陳平安危注於上意唐用裴度輕重繫乎  
厥身維迺純誠無愧前烈懋服休命往其欽哉

除韓絳觀文殿大學士知許州制

國家登延弼疑內以起功於庶事圖昇藩翰外以發政  
於四方閔勞申恩倚重均體肆專不號庸詎廣朝具官  
韓絳躬莊厚之姿函忠忱之度濟世美以特立告辰猷  
而具臧婁陪國均實輔台德嚮自保釐之寄再膺翼亮  
之姿高平師師總脩眾職之采公孫斤斤參聽百官之

成又宣于勤閒翹以疾確辭幾務之劇祈即燕申之休  
感于朕聰姑徇爾欲宜還宰執往建州麾陟春官常伯  
之尊兼禁殿隆儒之冠載更功號增衍并封於戲乃眷  
臣鄰雖爾身之在外不忘壽考豈茲心之謂遐其服寵  
章以將福履

范育直龍圖閣知秦州誥

錢勰

古者不以勇猛為邊貴謀而賤戰故國家妙選耆儒顯  
付方鎮外以訓齊戎旅而內以息安元元用此道也具官  
范育才猷智略夙膺器任選眾揆材往臨帥闡夫新秦  
輿區控扼汧隴綏懷夷落應援新邦無以久安而忘備  
豫祗膺休顯益思報稱

除燕達武康軍節度使充殿前副都指揮使勳  
封如故制

李邦直



所父之官司王爪士上將之任為國虎臣予得智勇之材俾共左右之位誕敷休命播告大廷具官燕達拔迹戎行厲躬武節深明分數之守兼識變通之權捍外侮於西陲佐濯征於南服嘗鼓儻趨阨以奮率烝徒能降城艾旗以盪定逋寇夙付簡稽之籍進督號噉之軍人知訓齊眾不譁放是嚴師律擢扈殿巖越從廉車遂總齋鉞於戲惟威愛足以臨下惟忠義可以報君勤懋乃心欽迪朕意

尚書祠部員外郎知制誥直學士院孫洙可翰  
林學士知制誥

以文辭為號今明諭朕志于天下者在制誥陳古今論得失裨朕之欲聞者在訪議二者皆學士職之故於侍班為親且貴以爾具官孫洙繇學術行誼顯進有名

于時博習墳史多識典故代予言訓蔚然可觀真秩禁林使與材稱恩寵茂矣爾慎旃哉

除范純仁觀文殿大學士知穎昌府制 曾子宣  
謀謨廟堂入則股肱於大政偃息藩翰出則師帥於一方維時宗工引疾辭位均逸近輔敷告大庭通議大天守尚書左僕射兼中書侍郎上柱國廣平郡開國公范純仁端良稟於世資樂易成於天性有砥名厲行之志有面折廷爭之風越自累朝寔更華選暨冲人之嗣服通文母之仰成咨于臣鄰付以宥密一踐樞要再秉國均朕恭已紹庭嚮明圖治緝熙緒業追遙先猷方有望於弼諧遽固辭於機務重違爾志姑即厯安增祝秩之榮名進陪封之寵數式隆體貌何吝眷私於戲論道經邦常在倚毗之地承流宣化勿忘勵翼之心祇服朕言



往共爾位

徐禧給事中誥

曾子固

有事殿內之臣職在於平奏述詳命令糾其違者而正之爾其是者而行之至於決獄官人條陳法式之事莫不當攷察焉其任可謂重矣具官徐禧以材進拔典執邦憲茲用推擇俾踐厥位惟精敏不懈可以周閱讀惟忠實不撓可以司論駁朕方觀爾之效爾尚勉於厥修具居厚京東轉運副使呂孝廉可轉運判官誥朕進技能更以督視一路蓋州縣政令之舉措公私貨食之斂散莫不任焉得人之難攷擇惟慎以爾幹敏閱試惟舊用是分茲東部屬以使事夫施於民者厚而刑罰請求於民者約而財用贍使德流澤通而風化輯穆以稱朕憂憫元元而勵精庶務之意爾其勉矣往服訓

辭

除曾布右僕射制

曾子開

左右置相以揔吾喉舌之司東西分臺以幹我鈞衡之任居中如鼎足之峙承上若台符之聯相須而成闕一不可迺登次輔以告大廷左光祿大夫知樞密院事上柱國魯郡開國公曾布敏識造微懿文貫道器周小大之用智適古今之宜被禘考特達之知亟濟禁從膺先朝倚注之重久執事樞而能悉心公家宣力夙夜忠以迪上誼不辭難憂勤百為壯老一節肆朕纂臨之始尤嘉翼戴之勞參稽師言圖任舊德文昌端揆之列紫微陪侍之班合茲寵名作我近弼仍遷階品增衍戶封於戲朕有休息百姓之心汝則覲文而匿武朕有綜覈庶工之志汝則務實而去華以至甄序材良敦獎正直澄



清風俗振肅紀綱使萬物各得其平無一夫或失其所  
汝之職也尚往欽哉

左武衛上將軍郭逵特贈雄武軍節度使誥

念功隱卒國有彝章矧予勞舊之臣嘗處訐謨之地奄  
終壽考宜極哀榮具官郭逵少也知書長而甚武蚤著  
戰多之績深通靜勝之謀伏波未衰尚威名之可億營  
平既老亦籌策之是咨孰云注意之辰忽起云亡之痛  
聽鼓鼙而增感賜鐵鉞以飾終尚其有知膺此異數

正議大夫知鄧州蔡確復觀文殿學士差遣依

舊

法始於貴者所以示朝廷之公恩篤於舊臣所以為天  
下之勸眷吾近弼嘗絳微文雖符守之既更顧寵名之  
尚闕吏民安仰廉陞未尊具官蔡確材術疏通謀猷膚

敏與聞機政自元豐之紀年升冠宰司當末裕之復土  
屬均勞於輔郡旋褫職於殿廬原情無他在法當復尚  
淹時日以塞人言未忘矜念之心難廢公平之典備顧  
問於幃幄稍還近班宣條教於翰垣益思盡瘁

范純禮復天章閣待制樞密都承旨誥

樞機之地選用士人宣納密命自神考始肆予纂服收  
拔端良實諸左右蓋遵先志具官范純禮夷易有守篤  
實無華恂恂自持言行相顧失職茲久秉心不移起分  
州符未厭輿議其還延閣侍從之遽來贊右府訐謨之  
微副予咨求好爾忠益

立皇后孟氏制

梁燾

正家者義之先天下從而定矣大昏者禮之本聖王所  
以重焉朕繼體持盈側身思永方切基圖之固敢娛宮



室之安太母以萬世為心命度宗事之重大臣以兩極  
陳義請建坤儀之尊謂王道之大所由興故人倫之始  
不可緩明揚德閔之懿簡在慈闈之公欽承溫詔之音  
俾正中宮之位載蠲吉日敷告大廷故侍衛親軍馬軍  
都虞候眉州防禦使贈太尉孟元孫女忠孝令門善慶  
奕世幽閑等靜藹聞和聲婉睦惠慈雅應柔則天作之  
合文定厥祥人謀協從龜告并吉是宜入聽內職輔宣  
外和式瞻禕翟之章上直軒龍之象嘉典大備並行今  
古之情文盛德有開增美國家之治理於戲惟恭儉為  
富貴之守惟憂勤為康樂之資如關雎之進賢則可以  
基風化之成如樛木之逮下則可以將福履之盛用又  
乃濟匪初其難勉爾欽修以法三宮之端一相予顯祀  
宗七廟之清明垂光紫庭襲譽彤管可立為皇后

邢氏進號賢妃制

孫巨源

王宮六寢崇建婦官天極四星垂著妃象所以協宣陰  
教助穆宸闈矧視秩於上公必敷求於淑哲朕勵精于  
治選納尤希嬪嬙靡充位號多闕茲延登於邦媛用播  
告於路朝婉儀邢氏德稱後庭體合法相居念保阿之  
訓動循環佩之音授弓矢於媒祠占熊罷於吉夢是宜  
詳案舊典升備列妃進參愉狄之華益昭彤管之煒坐  
論婦禮正始國風品冠六儀名超九御於戲周南之詠  
卷耳無險詖私謁之心齊詩之美雞鳴有警戒相成之  
道寵靈烜赫禮秩優隆匪時婉嫕之良疇若褒嘉之命  
佐后內治爾尚勉哉

尚書左丞梁燾資政殿學士同醴泉觀使詰

呂陶



君臣之會遇豈不難哉平居竭股肱之効則與之合謀  
一旦有筋力之憂則遂欲去位違從之際朕甚重之雖  
朝廷始終之恩固無所聞而賢者進退之分亦貴其  
全爰有寵章以褒遠業具官梁燾蘊造道之深識知事  
君之大方早以文學之望更直於儒林晚以諫諍之才  
盡規於治路向從內相之選進領中臺之權資其納忠  
距此周歲左綱已舉知戴胃之有勞竒論不聞惜少翁  
之告病遽形奏牘求解政幾章却復來至于五六爾既  
懷知止之義屢請於朝予亦有優賢之心敢勞以事宜  
躋華於秘殿仍允職於真宮示以眷存遂其安佚惟五  
福之報德必錫之壽康惟大臣之愛君不繫於出處其  
綏吉履益茂壯猷

中大夫守尚書右丞李清臣可太中大夫依前

守尚書右丞誥

王震

朕初續承大賚于天下雖汪洋之澤所被者廣要以貴  
賤遠近為先後隆殺之節故吾政事之臣所以褒嘉者  
既不敢後而致隆焉具官李清臣秉德含章將明密勿  
先帝圖任以貳政幾弼予一人與有勤績徽章爰錫祿  
秩有加進陟勲資益陪帝賦終審厥與爾則有辭惟予  
一人並受多福

朝請郎權發遣陝西運副葉康直可朝奉大夫  
再任承議郎權發遣陝西運副李察可朝奉郎  
再任

朕惟西土弗靖爾則在行靡征不從日月逾邁典護邦  
計實繁厥勞練達邊機毋易爾舊宜加寵陟申即故封  
有功見知其說毋斁



蔡京降太子少保致仕制

張閣

政事所寄尤嚴誤國之誅人臣之姦莫重欺君之罪我有常憲揚于大庭太師致仕楚國公蔡京頃以時才久膺柄任兩冠台衡之峻三登公衮之崇庶圖爾庸以弼予治而總秉機務出入八年事寔紊於將來謀悉違於初議擅作威福妄興事功輕爵祿以示私恩濫錫予以蠱邦用借助姻婭密布要途聚引兇邪合成死黨以至假利民而決興化之水託祝聖以飾臨平之山豈曰懷忠殆將徼福屢有告陳之迹每連狂悖之嫌雖僅上於印章猶久留於里第偃蹇弗避傲睨罔悛致帝意之未孚昭星文而申譴言章繼上公議靡容固欲用恩難以屈法宜褫師臣之秩俾參宮保之官聊慰群情尚為寬典於戲天事尚象明罰所以弭灾人道惡盈省躬所以

引咎往欽善貸無重後愆

西京左藏庫副使楊文廣可供備庫使誥

沈文通

前日南夷負恩為亂以覆壞我郡邑至於用師而後定雖朕不德不能懷服方外而亦將吏不戒不習之罪也故深察往失而推擇所遣益不敢輕惟爾文廣材武忠勇更事有勞故今以爾惣一道之兵戍于邕管又陞爾于諸使之正以重其行爾其祗聽朕命戒疆事習軍計使南徼無警而朕為知人則時乃之功矣其往欽哉

西京左藏庫副使高允元可文思副使誥

武吏以材勇進以功力賞古之制也方天下無事兵革不試則汝武吏安得自效以取賞哉然內外之職歲月之勞亦不可遺也今允元最狀既應陟法其增秩一等



以明勸群吏

章棗同知樞密院誥

鄒志完

朕惟天下治安之本實在二府故文武雖若異任而眷注未嘗不均必求其人以贊樞極具官章棗受知拓廟擢付師權既生致於酋豪且廣恢於境土屢形捷奏數被稟嘉眷宥密之須才越班聯而登用蔽自朕志寵示殊恩惟不忍肝腦之塗郊原故能愛重人命惟備見飛輓之耗帑廩故能謹惜邦財事在變通爾知之矣勉思所以善其後者以副朕濟民仁壽之意

呂希哲直祕閣知曹州誥

祕閣聚天下之圖籍以崇養豪英以鑑觀理亂惟時分直不輕授人以爾學知所宗行與言稱方從卿寺出輔藩垣茲用褒嘉以為爾寵夫濟陰患盜久矣以爾之不欲而表勵之則雖賞之不籍將不時見於空言而已往其懋哉

元

翰林承旨王磐贈官制

王之綱

崇德報功恩靡忘於先正易名節惠禮具載於彝章故翰林學士承旨資德大夫知制誥兼脩國史領集賢院事致仕王磐志大以剛識明而遠惟根本培植於內者確乎不拔故英粹發越於外者燠乎有文出處無愧於心窮達不易其守潛知逆黨星言發青社之謀明斥權姦露奏重紫微之柄出于藩則用蘇民氣入視草則允契宸衷贊大議於廟堂播清芬於簡策諫止東伐奮不顧身請復外臺毅然抗疏是以皇帝篤褒嘉之眷昭考垂飫賜之勤正有待於乞言何屢陳於謝事榮歸梓里



庶衍椿齡朕方嗣服於丕基天不憖遺於一老追惟往  
行惕用興懷俾超進於孤卿仍具頒於寵數於戲千古  
淵源之學篋以踰脩一生忠義之心諒無愧軼顧二賢  
已膺於美謚而兩字宜婢於前休精爽如存欽承不昧  
可贈榮祿大夫少保謚文忠公

左丞董文炳贈謚制

李槃

折衝禦侮誠社稷之良臣崇德報功實國家之令典途  
雖殊於生死禮當極於哀榮故資德大夫中書左丞僉  
書樞密院事董文炳王佐之才將家之子自出宰於劇  
縣嘗入侍於潛藩山路間關謁戎輅遠趨於六詔風濤  
洶湧扈龍舟首渡於三江迨予嗣服之年委以專征之  
任截彼淮浦至于海邦招降兩浙之新民撫定七閩之  
故地大小數百戰奮不顧身勤勞三十年厥有成績往

者睢陽城下父已歿於兵鋒比來揚子橋邊男復終於  
王事一門忠孝萬古芳香及茲幹事而回方以不次而  
待何言中路殲我良人蓋非卿孰佐於朕躬而獨朕悉  
知於卿意弗頒異數曷慰永懷其陞一品之榮以賁九  
泉之隧倘其有識歆此無窮可贈金紫光祿大夫平章  
政事謚忠獻公

太保劉秉忠贈謚制

臣以忠孝而事上貴輸獻納之誠上以禮義而待臣思  
篤始終之愛視死之日猶生之年故光祿大夫太保參  
領中書省事劉秉忠學窺天人識貫今古邃冲而有守  
安靜而無華昔侍潛藩稔聞高論適當三接之際懇上  
萬言之書蓋將舉天下而措諸安以戒為人主者果於  
毅朕嗣服而伊始卿盡力以居多蓋得卿實契於朕心



而獨朕悉知於卿意事皆有驗人匪他求周旋三十年  
不避其難剴切數百奏各中其理共成庶政方圖任於  
舊人誰謂旻天不憝遺於一老興言及此何日忘之載  
惟台輔之尊厥有泉竊之責是用錫之綸命峻一品之  
華階櫨以袞衣躡三槐之正位復加顯號允答殊勲惟  
爾英靈識予哀寵可贈儀同三司太傅謚文貞公

加封孔子父母制

謝端

闕里有家系出神明之胄尼山請禱天啓聖人之生朕  
聿觀人文敷求往哲惟孔氏之有作集群聖之大成原  
道統則堯授舜傳之周文王論世家則契至湯下逮正  
考甫其明德也遠矣故生知者出焉有開必先克昌厥  
後如太極之生天地如鉅海之有本源雲仍旣襲於上  
公之封考妣宜眎夫素王之爵於戲君子之道考而不

繆建而不悖于以敦典而敘倫宗廟之禮愛其所親敬  
其所尊于以報功而崇德尚篤其慶以相斯文齊國公  
叔梁紇可加封啓聖王魯國太夫人顏氏可封啓聖王  
夫人

御史大夫相嘉碩利封謚制

列爵之等以馭貴孰加於諸侯王元勲之胄而象賢宜  
膺於三錫命云胡殄瘁之蚤重予盡傷之懷故榮祿大  
夫江南諸道行御史臺御史大夫相嘉碩利鍾純美之  
資負經濟之略粵若迺祖相我世皇始成混一之功末  
受顧託之命襲其善慶惟時聞孫不階父師之訓而忠  
孝夙成篤於君臣之誼而夷險一致居給舍則伏蒲而  
抗論司宥密則彊本以折衝河汴交流分廟堂之重寄  
東南都會長端憲之崇班皆能綏輯士民肅清綱紀甘



棠之愛遺澤猶新喬木之家清風未愍夫既世濟厥美而不天假之年繁淮陽之故圻爾先世之胙土迺啓封而陞秩仍節行而易名具之贊書賁于幽壤於戲霖雨舟楫之用雖不究於當時河山帶礪之盟尚益昌於爾後英爽未遠服茲寵靈可

左丞許衡贈官制

姚端夫

天非繼聖學之墜緒則不生命世之大才國欲與王道以比隆肆用為丞民之多覺何物故之已久尚人思之未忘故資善大夫中書左丞集賢大學士兼國子祭酒教領太史院事許衡王裕而金相準平而繩直出處則惟義所在言動亦以禮自持休休焉有容屬屬乎其敬人能弘道惟朝聞夕死之是期我欲至仁匪晝誦夜思而不得行已似秋霜烈日化人如時雨和風來席下之

樞衣滿戶外者列履達簡在帝心者率多丞弼窮固守師說者不天善良鶴鳴九臯而聲聞于高鳳翔千仞必德輝乃下爰立相以堯君舜民之志所告上皆伊訓說命之言丹扈斥姦少不避雷霆之軋擊青臺治曆本於筭日月而送迎繇理窮而智益明隨任使而職斯舉今既亡矣誰其嗣之於庫在爾身有垂沒世之名於朕心有失同時之恨雖成廟納書以命蓋固已振木鐸之高風而功臣胙土則未加用申錫密章於下地光靈如在寵數其承可贈正學垂憲佐運功臣太傅開府儀同三司追封魏國公仍謚文正

元帥烏野而封謚制

惟太祖之基命龍遂乘雲有良臣以樹勲魚猶得水展我同姓豈伊異人故金紫光祿大夫北京等路兵馬都



元帥烏野而氣鍾光嶽之純全誠貫金石之堅確智足謀國勇則冠軍佐天運之維新憤人心之未定既降復叛必煩以行故自北而徂南首遼尾魏亦攘左而塞右膺齊背秦語其跋履於四方數豈戎衣之百襲為庸已懋其報宜豐可當非劉氏之不王姑啓若魯侯之大宇併申褒典少慰英靈噫佳城之鬱年三千名固已昭乎白日分國於肇州十二澤期不斬於黃河可贈某官追封營國公諡忠勇

元帥紐鄰贈諡制

朕聞率土之臣莫如同姓干城之將尤可異恩故遠稽於禮經用厚加乎愍冊具官某其在弱冠嘗為選鋒迅與鷹揚號為萬人之敵虓如虎視隱然千里之威屬鉅寇之及郊之總戎之制閫求可居此孰有異然其為人

心所歸不待君命之至推使秉鉞辭拒循墻即下令於轅門已折衝於尊俎握機旗建四川之草木知名開壁鼓行三峽之星河動影勇頗牧之非匹策孫吳之可方入阨危則膺眾所不先分賜與則如士之最下勁騎所蹙堅城每摧如斯宣力於兩朝何止出奇於百戰嗚呼降年弗末為烈則多雖狀不及識之亦心未嘗忘者置戶以守何樵牧可侵馬鬣之墟故壘即封或魂魄猶思蠶叢之國可贈某官追封蜀國公諡忠武

丞相阿塔哈封諡制

臣為委質勞於同軌之間國以念功恩及襚衣之後雖飾終其時有所未及在追恤今日烏可或遺爰寵幽褒用昭異數故光祿大夫江西等處行中書省左丞相阿塔哈力齊嶽負量與川涵託開國將種之苞根挺明堂



工師之大木受任閩外賈勇籌邊為憲宗入蜀之前鋒  
因殘百粵非世祖投江以尺垂不返三苗報效之私寤  
寐不置百其身以奚恤一迺心之是期會師征險順而貞  
得夬剛決柔之兆考版圖之幅裂秉旌鉞以鼓行將削  
尊號於偏方必使義聲以先路勢乘破竹名正包茅有  
不待陣風蛇之蟠而已飛塵星駟之捷如震如怒社金  
革北方之強于理于疆盡江漢南國之紀群黎壺漿而  
崩角幼主席藁以泥頭瘁事匪伊成功能爾凡十年為  
丞于行省奄一旦違世於先朝白雲杳歸于青山清風  
空遺於黃閣像未麟臺之貌服先龍袞之升既進師垣  
又建王國俾大書於神路過者式焉示絕等於臣鄰忠  
斯勸矣尚膺茂渥少慰營魂可贈推忠翊運宣力功臣  
開府儀同三司太師上柱國追封順昌郡王謚武敏

丞相塔剌哈贈謚制

出入帷幄在人十能而已則千計謀廟堂為相一年而  
疾居半竟邦家之殄瘁宜王禮以追崇故開府儀同三  
司中書右丞相監脩國史太保太子太師知樞密院徽  
政使中政使宣徽使左都威衛指揮使塔剌哈維昔開  
國之遺苗乃今太師之元嗣由爾世胄為我親臣事世  
祖至今也凡三朝職食官而久者非一日灼其廉明而  
忠亮與夫恭遜而溫文眷茲中書出庶政之原居以右  
相絕百僚之席使加中政機總六軍善調護而長宮師  
監纂脩以成國史如此重責皆所裕為一德可以寬鄙  
夫片言奚止簡繁務思過榮之可懼視倖利以不貪同  
縮銀艾者十人爾先辭免其太尉均受錫田以萬畝爾  
獨還致於司空觀父子之並相一門求聖賢與尚友千



古改爲改作緇衣何賴乎武桓拜後拜前赤舄未慙於  
周魯方歌功於清廟倏委魄於玄閭豈意少者沒而老  
者有益信神難明而理難測憐乃公獨傷於漠北誓爾  
後均胙乎淇陽嗚呼何但上下床盡餘子可東之高閣  
如失左右手慨正人不作於下泉咨爾靈明歆朕休命  
可特贈封謚爲懷忠昭德佐治功臣開府儀同三司太  
師上柱國淇陽惠穆王

封宣聖夫人制

虞伯生

我國家尊典禮以彌文本闈門以成教迺瞻素王之廟  
尚虛元媿之封有其舉之斯爲盛矣大成至聖文宣王  
妻并官氏來嬪聖室垂裕世家遷豆出房因沅風於殷  
禮琴瑟在御存燕樂於魯堂功言邈若於遺聞儀範儼  
乎其合德作爾緯衣之象稱其命鼎之銘噫秩秩彝倫

吾欲廣闢睢鵲巢之化皇皇文治天其興河圖鳳鳥之  
祥可特封大成至聖文宣王夫人

光祿大夫平章政事大司徒徽政院副使領將  
作院事張九思贈推誠翊亮功臣開府儀同三  
司太傅上柱國魯國公謚忠獻制

趙子昂

功存翊衛睠惟先正之臣國有彝章式舉追崇之典宜  
頒異渥以賁重泉具位寬厚有容質直好義早逢熙運  
位登喉舌之司逮事春宮身任羽翼之寄屬奸臣之作  
亂閉宮門而弗開倉猝之間忠節可尚太皇知其謹慎  
委任盡其始終世祖疇其勲庸爰置諸其左右天下誦  
司馬光之字朝廷推萬石君之風從容乎廟堂密勿乎  
禁近鞠躬盡瘁弼亮三朝正笏垂紳夷險一節謀猷方



資於啓沃疾病遽得於勤勞雖沒世之有年亦懷賢其  
無已是用封之東魯建干上公三司同開府之儀八柱  
表承天之力示崇德報功之澤極生榮死哀之情於戲  
朕惟圖任舊人天不憖遺耆老九原莫作一品斯崇夫  
推賢盡誠之謂忠賢德有成之謂獻合茲節惠以著嘉  
名咨示英靈服予寵命可

平章廉希憲贈謚制

元復初

惟我世祖皇帝肇自藩服受鉞專征天資良弼爲之左  
右一家四海傳次在予名爵之崇顧斯實斯故榮祿大  
夫中書平章政事贈清忠粹德功臣大傅開府儀同三  
司追封魏國公謚文正廉希憲清忠粹德文武元臣蚤  
以門閥之賢入膺寄託之重非詩書不陳於上前非仁  
義不行於天下憂國忘家愛民如己西靖秦蜀東極青

齊北清遼碣南鎮荆湖在中書者曾幾何年而能立大  
法銷大患進大儒推大姦恥身弗及伊周恥君未邁堯  
舜言昔賢之所難爲人臣之不敢疑然三代之佐蓋將  
師表百世者矣天不憖遺哲人先萎雖諸子列官省臺  
於朕心猶懷舊德是用進以極官加之上爵於戲表賢  
能所以尊朝廷也假名器所以報忠貞也稽若王章得  
茲二美凜乎生氣天地猶存服此殊榮尚開爾後可加  
贈推忠佐理翊運功臣太師開府儀同三司上柱國恒  
陽王仍謚文正

樞密趙良弼贈謚制

昔聖祖歸自武昌啓皇元始於中統天人胥贊宗戚叶  
從無回僭逆之餘輒作陸梁之態誰其將指先二使以  
逆征事則從權衆群凶之畢殄興言及此軫念文之資



善大夫陝西等處行中書省參知政事趙訓父僉書樞  
密院事良弼才周庶務而洞察其幾學貫三才而不滯  
于用既輸誠于佐陝亦盡瘁于行東撤蓬戍之藩籬淨  
織氛于雲棧易卉裳而冠帶渺一介于滄溟凡危衝  
煦之突來必大義純誠而自處故平生之偉績恒簡在  
于宸衷宥密八年除夷一致謙謙素履具見于與刑婉  
姪良籌每資于匡翼賜第之留未久引年之請彌堅雖  
房喬不忘秦府之游而李泌雅志嵩陽之隱在今日  
堪倚重顧舊臣寧復如卿特示崇褒益申異渥於戲迪  
世以章平之訓有蔚其華疏封於趙魏之才所憑者厚  
朕將示勸卿其欽承可特贈推忠翊運功臣太保儀同  
三司追封韓國公謚文正

中丞于璋贈謚制

善人天地之紀德莫有加君子邦家之基歿猶不朽曠  
懷遺直追錫殊封故資德大夫江南諸道行臺御史中  
丞于璋志蘊忠貞運逢熙洽慶雲甘露氣和而動植自  
宜威鳳祥麟瑞應而猛鷲咸伏結深知于世祖參大政  
于武皇澄清每振于憲綱動靜允維于國體逮朕嗣服  
召卿來廷賜以繡衣執法應中端之象專茲白簡行軺  
寬南顧之憂遽何馳計之聞蓋有崇裒之渥於戲劉寬  
長厚允宜居鼎鼐之司胡廣中庸謂當久臺閣之任事  
乖徃古思慰九原咨爾營魂服我休命可贈推誠肅政  
功臣光祿大夫平章政事上柱國追封薊國公謚文簡

平章張珪封蔡國公制

吳澂

天地之間有正人國家恃以為元氣卿之忠蓋朕所眷  
知比因疾以祈閑爰加恩而優老榮祿大夫中書平章



政事張珪彝常世闕廊廟宗工早摠戎旃已作禮樂詩  
書之帥晚司化軸遂稱文學政事之臣左右六朝出入  
三府險夷不易其守鯁亮以如其初太清罹薄食之昏  
前期致沐浴之請越予新服嘉乃舊勲諤諤之節詎肯  
詭隨侃侃而言類多裨益黯雖謁告奭尚勉留俾辭鞅  
掌之勞專罄格心之學緬惟先正嘗平金壘以立功宜  
得後昆復就蔡封而襲爵所謂故國庸建上公思竭爾  
忱廣敷陳於經幄欽承時命永翊贊於皇猷可封蔡國  
公提調經筵事

丞相阿里海牙贈謚制

王構

朕惟不世之主膺不世之運非常之人立非常之功方  
一統之宏開有六師之分董鄂漢順流而下勢甚建瓴  
荆湖堅壁者多事猶掣肘儻弗資其雄略其何奠于遐

方故弁祿大夫湖廣行中書省左丞相阿里海牙端懿  
而疏通聰明而果銳禁廷久侍簡眷良深朝政參知弼  
諧不賴遭明時建長策機決于十年之先殄餘孽芟群  
凶威行于萬里之外下江陵以爲之根本破長沙以潰  
其腹心外梗咸除率虎旅平吞于桂海降旗隨豎故龍  
驤直抵于錢塘荷惟黻袞之加煥若雲章之諭錫賚榮  
多于貴近勞還位亞于侯王忠於國惠於民靡不用其  
至也報爾功崇爾德孰能與于此哉雖當年左揆之持  
升顧今日彝章之未舉佇遂圖形之制彌深撫髀之思  
爵首冠于台司封乃疏于舊國曰武以旌其戰伐曰文  
以著其和平名則易之期百千世禮之同者惟一二臣  
於載周宋爲鐔石城爲鋒朕仰繼皇王之大武黃河如  
帶泰山如礪卿允爲宗社之元勳尚冀英靈永言猷格



可特贈佐平南紀宣力功臣開府儀同三司太師上柱國追封楚國公謚武定

丞相答刺罕贈謚制

予欲宣力四方所賴人才之叶助天不憖遺一老其何治化之成能故中書右丞相哈刺哈孫答刺罕嶽瀆英靈乾坤閒氣執德弘而信道篤提身正而格物深判宗寺兼示恩威奠藩封于磐石之固坐廟堂不動聲色指天下于泰山之安位不以內外為重輕事不以險夷為去就廓神明之蘊有室皆通推惻隱之心靡冤不釋惟獎善疾邪之太甚故積憂成恙以相仍言仁義如魏文貞寧恤儉徒之巧沮佩安危若韓忠獻詎容神器之它攘刃游于批大卻之餘器別于遇盤根之際離綱未綴一誠堅抗群囂泰運重開百慮竟如素策顧嗣基之伊

始其佐命者惟卿載續武功出膺邊瑣駟介不煩于屢駕袞衣佇俟于來歸云胡馳計之聞遽爾輟朝之勤雖卿之所守匪生而存匪死而亡然政有或疑奚究而問奚取而決詢之輿議揆以舊章貞王超異姓之封顯秩冠上公之貴治典教典並以褒崇東平廣平圖俾專美嗚呼國家之講制度一二臣式克似之天理之在人心百千世不能易也永言孚格以啓方來可贈推誠履正佐運功臣太師開府儀同三司上柱國追封順德王謚忠獻

平章史弼封鄂國公制

嗣德罔不在初粵彝章之具舉舊人不克遠省疇偉績之特書榮祿大夫平章政事議樞密院事提調諸衛屯田事史弼器博而用周志剛而行敏早繇禁藥出惣戎



行英明兼本乎天資方略悉合于古法視長江如履平地居然獲跳盪之功撫疲黎猶保稚嬰允矣著綏懷之效始自淮襄之百戰迄于嶺海之同風顧宣力之獨多其推誠則弗替終始三朝之眷賜環屢壓于宸班優游六藝之文綏帶雅稱于儒將是宜賁之華綬衍以真封以酬既往之勞以示惟新之渥於戲功臣圖象秩盍冠於褒公元老壯猷忠尚資於方叔益圖報稱祗服訓言可特加銀青榮祿大夫封鄂國公

翰林承旨姚樞贈謚制

昔有先正蚤事聖皇惟夙夜單厥心而終始典于學如伯益之贊夏禹暨尹躬之佐成湯行乎仁義之塗任其社稷之重計于廟堂之上明夫事幾之先蓋精神志意之相孚故啓沃都俞之靡閒制難拘于一例恩特侈于

屢書故翰林學士承旨中奉大夫詳定禮儀使贈榮祿大夫少師文獻公姚樞以淵識弘謨爲國著祭以清彝素檢爲時楷儀曉萬事安異同式群工壹統略周旋必禮溫溫維德之恭敷納以言蹇蹇匪躬之故止殺允符于宸慮宣澤不應于天功以故終和且平近者親遠者附不賞而勸大臣法小臣廉國家之表裏可觀風俗之樞機隨轉績已成而弗有身愈退而彌尊顧當時耆壽其誰歟致今日隆平者公也正事正言正道親傳文祖之燕謀有德有功有能首被先朝之鴻訓肆朕纂承之始於公簡注之深槐序延登衣仍袞黼棠陰未徙胙迺龜蒙因謚以正其名崇章以介其社於戲得天下賢材斯足矣方圖政化之新有朝廷大議則就之慨想儀刑之舊徃欽茲命以求其傳可加贈嘉猷程世舊學功臣



太師開府儀同三司追封魯國公仍謚文獻

留守段貞贈謚制

蕭司留務漢高隆端本之規垂作共工虞舜迪有邦之訓昔聖皇之在御稽往古以建官惟時亮功朕其疏渥通奉大夫大都武衛親軍都指揮使司達魯花赤提調大都屯田事大都留守兼少府監段國幹故父銀青光祿大夫司徒武衛親軍都指揮使司達魯花赤大都屯田事提調大都留守司少府監事貞際亨隆之運效乃所長襲通敏之休善於其職端莊恪慎周密疏通心休休焉如有容器渾渾兮靡可限卜澗瀝食惟洛議首定於遷都象天漢揆之宮勲屢書于考室應叢機則曲當奮奇略以無前審勢度材六司之事異矣攻金刮玉一器而工聚焉歷華貫凡十七階翼皇基于億萬載慨生

存之莫復宜褒謚之兼崇以衍封腴以疇勤濟於戲紫微丹闕非徒示壯麗之威鯁論直言無復見典刑之舊尚其英爽式克欽承可持贈效忠宣力功臣大傳開府儀同三司上柱國追封安國公謚武宣

追封孟子父母制

張士觀

朕惟繇孔子至於孟子百有餘歲而道統之傳獨得其正雖命世亞聖之才亦資父母教養之力也其父夙喪母以三遷之教勸天下後世推原所自切莫大焉稽諸往代實闕褒崇夫功大而位不酬實著而名不正豈朕所以致懷賢之意哉肆頒寵命永賁神休可追封其父為邾國公母為邾國宣獻夫人

中丞崔彥贈謚制

獻可替否治獲佐於明時崇德報功禮宜加於卹典故



榮祿大夫平章政事御史中丞領侍儀司事崧或山川  
閒氣簪紱名家俾司繇絕之儀繼被瀛洲之選靡繇一  
介之助自結九重之知遂擢置於秋卿俄紀綱於柏寺  
奏寢宮嬪之議罷征日本之師章疏可方之古人搢紳  
無出其右者擅生殺之柄忍容義甫之姦抑聚斂之臣  
力止延齡之相兩過文昌之府嘗僉宥密之司于琴瑟  
更張之初替匕鬯主器之決屬元貞方大有為之日適  
先帝重中執法之官視左右何以易趙堯在朝廷不可  
無汲黯薦耆儒而備顧問崇名教以渙絲綸活人命於  
頃刻之閒回天威於雷霆之下以去留繫憲臺之輕重  
辨邪正公天下之是非凡可以尊主而庇民曾不避犯  
顏而直諫慨話言之尚在想風采之如存未孚于休以  
昌厥後可贈推誠履正功臣太保開府儀同三司追封

鄭國公諡忠肅

平章李庭贈諡制

混一之期有開于真主恢攘之寄允賴於忠臣其器博  
則用迺周其才全則效斯著顧奏捷獨多于群帥而疇  
庸豈限于彝章故榮祿大夫平章政事議樞密院事提  
調諸衛屯田事兼後衛親軍都指揮使李庭宣力襄樊  
振威嶺海甫師干之歷試俄斧鉞之升崇劔敵萬人縱  
橫制變衝當一面出入如神納之牛腹而獲生載賈登  
俾之勇蔽以馬羈而捷驚疇爭執訊之能其韜鈴動合  
于昔賢故聲烈特聞于今日至于扈聖祖東除僭孽所  
向無前翼先朝西奠遐陬其猶克壯決策于未然而策  
無遺者審幾之先見而幾則灼然緬懷熊豹之姿忍聽  
鼓鼙之奏生也加封之弗遠名焉節惠以為宜於戲黼



冕桓圭昭其文昭其度王符麟節傳之子傳之孫精爽  
如存寵光無斁可特贈推忠翊衛功臣儀同三司太保  
上柱國追封益國公諡武毅

封周子為道國公制

霍希賢

蓋聞孟軻既沒道失其傳孔子微言人自為說諒斯文  
其未喪有真儒之聞生濂溪周惇頤稟元氣之至精紹  
絕學於獨得圖太極而妙幹萬化著通書而同歸一誠  
俾聖教燦然復明其休功尚其不泯朕守成繼體貴德  
尊賢追念前脩又稽彝典已從廟庭之祀盍疏鄉國之  
封於戲霽月光風想清規之如在玄衮赤帶冀寵命之  
斯承

許衡為懷孟教官制

楊果

咨爾許衡天資雅厚經學精專大凡講論之間深得聖  
賢之奧受罰者恐陳君所短為盜者畏王烈之知所在  
向風真堪正俗可今於懷孟等處選揀子弟俊秀者舉  
歸教育取作範模再令董子帷前有傳授之弟子重使  
王通門下皆經濟之名臣毋喪斯文以弼予治

加封孔子制

閻子靜

蓋聞先孔子而聖者非孔子無以明後孔子而聖者非  
孔子無以法所謂祖述堯舜憲章文武儀範百王師表  
萬世者也朕纂承丕緒敬仰休風循治古之良規舉追  
封之盛曲加號大成至聖文宣王遣使闕里祀以太牢  
於戲父子之親君臣之義永惟聖教之尊天地之大日  
月之明奚罄名言之妙尚資神化祚我皇元

追封伯夷叔齊制

蓋聞古者伯夷叔齊逃孤竹之封甘首陽之餓讓爵以



月長幼之序諫伐以嚴君臣之分可謂行義以達道殺  
身以成仁者也昔居北海之濱遺廟東山之上休光垂  
乎千載餘澤被於一方永懷孤峻之風庸示襲崇之典  
於戲去宗國而辭周粟曾是列爵之可縻揚義烈以敷  
清塵期於世教之有補可追封伯夷爲昭義清惠公叔  
齊崇讓仁惠公

丞相伯顏贈謚制

天下大統不嗜殺則一之聖主弘功蓋必資於賢者昔  
在至元之際方隆混一之期有來命世之奇材懋建殊  
常之偉績故太傅開府儀同三司錄軍國重事伯顏崆  
峒孕秀列象騰精居政府則不動聲氣措泰山之安未  
戎律則純乎仁義猶時雨之降當其聲鶴浦渝盟之罪  
總龍驤飛渡之師克廣世祖好生之心允獲宋人誠服  
之意衣冠不改市肆不易恩威普洽於三兵車書以混  
文軌以同聲教遂置於百粵遠朕纂承之始益申推戴  
之誠永懷社稷之宗臣宜侈河山之高爵於戲曹侍中  
江南之役規摹一何小哉郭汾陽異姓而王崇報斯亦  
至矣可贈宣忠佐命開濟功臣太師開府儀同三司追  
封淮安王謚忠武

丞相阿朮贈謚制

邊外開邊四達弗庭之域將門出將二持分闡之權  
緬思百戰之勞宜用九原之賁故光祿大夫中書左丞  
相兼都元帥贈開府儀同三司太尉追封并國公謚武  
宣阿朮英才聞世勇略邁倫當先皇大理之征佐迺父  
雲南之役靖蠻荒而平交趾拔襄漢而下江南爲瘴揮  
戈萬里若衽席之上龍驤飛渡三吳歸掌握之中贊成



混一之圖式副元勳之號按禮寺易名之典加王章異  
等之恩於戲青史屢書諒騰芳之有永黃河如帶尚流  
慶於無窮可加贈推誠宣力保大功臣太尉開府儀同  
三司上柱國追封河南郡王謚武定

丞相線真贈謚制

蕭曹翊漢素非閥閱之家房杜匡唐卒乏鈞衡之嗣眷  
先朝之碩輔繇累世之芳猷永懷弼亮之賢庸示襲崇  
之禮太傅錄軍國重事開府儀同三司中書右丞相監  
脩國史完澤之父故光祿大夫中書右丞相宣徽使線  
真稟靈河嶽著象星辰應明良千載之期萃忠孝一門  
之慶梯天力競元戎奠鶉首之郊扶日功高奕葉應龍  
飛之運惟昔中書之草創歷陳治古之宏規位望冠於  
百僚利澤施於四海躬承世祖肇隆中統之丕圖千侍

裕皇復贊元真之初政方倚具瞻之重宜昭先德之華  
維垣進秩於上台列爵仍疏於大國錫號著勳庸之偉  
易名申節惠之文殊恩允出於朕心卹典非由於汝請  
表南宮雲臺之像旣彰異渥於宗臣措天下泰山之安  
抑助貞勤於上宰尚服休命永播英聲可特贈宣忠保  
德佐理功臣太師開府儀同三司中書右丞相追封秦  
益國公謚忠獻

丞相和理霍孫贈謚制

北方閒氣寔生命世之材黃閣清風蓋出登瀛之選慨  
英靈之已往當卹典之崇頒故光祿大夫中書右丞相  
和理霍孫派接元勳慶鍾全德早躡鰲峯之首誕披雲  
漢之章開闢賢關為司徒而敷五教更張化瑟位冢宰  
以統百官恢揚累世之洪休新美至元之大政倫才如



崔祐甫之廣潔已有張忠定之剛著績熙朝既闡文明  
之治疏封列國宜居禮義之鄉可贈仁德協謀佐理功  
臣太師開府儀同三司追封齊魯國公謚文忠

丞相史天澤贈謚制

劉元

周制以八統詔王必先敬故漢官以列爵馭下亦自報  
功古有彝章朕茲申勸故開府儀同三司平章軍國重  
事中書左丞相史天澤性資貞亮器宇沈雄自開國以  
將三軍妙契淮陰之略至分茅而推千乘甚高孤竹之  
風况結知於累朝追總戎於四紀及朕纂承之始克膺  
輔相之良內秉國均兼亮機于右府外清邊陲幾授鉞  
于齋壇可謂威惠之交孚抑亦忠勤之備至繼以荆蠻  
之蠹重煩汴省之趨惟時壯猷行策功而飲至不圖晚  
志遽引年以謝歸申言齒德之尊端愈典刑之益命開

府第協贊廟謀方就佚于尊壘復遺憂于邊關真資偉  
筭用一遐馭顧上游之濟師方倚坐籌之勝愴中途之  
病革莫收卧護之勲弗飾厥終曷旌迺績宜表出群之  
行進登符六之階於戲國步方新天不憖遺于一老閔  
章加襜卿其未賁于九原營魂有知歆予畀渥可贈開  
府儀同三司大尉謚忠武公

許衡妻敬氏封魏國夫人制 鄧善之

魯國有真儒寔弘宣於道統周南得淑女必肇正於人  
倫肆予社稷之匡夙有閨門之化爰旌令則特示崇褒  
具官許衡妻敬氏性靜以貞行恭而順自職居主饋孝  
克奉於旨甘逮貴被展衣儉猶視於澣濯惟我宗工盡  
替襄之道由爾內助秉柔正之儀雖善慶之報方來而  
哀榮之典未稱庸視茅封而進秩式頒芝檢以疏恩於



戲夫婦相敬如賓亦既追榮於偕老公侯必復其始尚  
其啓迪於後人

丞相拜住贈諡制

袁伯長

八柱承天棟橈萌於巨構六龍御日輻說見於中街愍  
死難以成仁攷生榮而錫命故中書右丞相拜住鼎彝  
王社闕闕相門自結主知應雲龍之異遇獨持國是炳  
著蔡之先幾陳於上者不足言見於事者爲可則斥聚  
歛之臣以靖四表誅贖貨之徒以正庶官庫無餘財拔  
葵之訓靡替門絕私謁懸衡之鑑益公天下望其治平  
朝廷以少模楷然盡言招過儉謀愈深選賢與能奸黨  
滋懼變成肘腋禍起股肱山嶽動搖日月昏翳雖元兇  
正罰足明朕心在貞惠易名姑慰卿意分茅故壤增爵  
維垣噫未明入朝竟墮承宗之計盛服假寐孰爲鉏麇

之賢念此盡傷恩斯可渥可贈清忠一德佐運功臣太  
師開府儀同三司上柱國追封東平王諡中獻

平章不忽木贈諡制

盧亘

形微命穆清式觀天造將啓靖邦之嘉運必生名世之  
大賢挺出類拔萃之資行尊主庇民之學使其君臣同  
德夙夜盡心協贊機衡融景化於瞬息之頃深謀廊廟  
致太平於期月之間禮樂以之而興隆陰陽田之而順  
序昔聞其語今見其人故昭文館大學士榮祿大夫平  
章軍國重事行御史中丞不忽木明允篤誠溫文廉讓  
研精聖道得先儒淵秘之傳藻勵忠規承世皇簡注之  
渥存膺器使徧歷清華殫物洽聞而守以正經德迪慮  
而不近名厲熙朝更化之初開明堂垂拱而治升居台  
鉉俾罄訏謨一澄苛弊之源大洗姦諛之迹事至立斷



言爲天下之公知無不爲才實王者之佐攬群材而並  
進理萬變而不疑弘沃聖衷誕宇辰告翊先帝履尊之  
際輟元臣分陝之行再入秉鈞遽聞辭疾彌綸軍國閱  
勞機務之煩擬挈憲綱坐見朝廷之肅儵號隆福之倦  
馭驚梁壞而山摧寧不百年遂亡一鑑備觀規摹之  
盛可謂社稷之臣肆予撫軍言還懷茲懿德當宁而吳  
恨不同時圖高密於雲臺丹青圖既詠裴度於立禱柱  
石徒衰是用寵以帝傳之崇賜以周公之履庸起具臣  
之勸允爲儒者之光繫爾英靈歆茲明命可特贈純誠  
佐理功臣開府儀同三司太傅上柱國追封魯國公諡  
文貞

太史令王恂贈諡制

王繼學

洪惟世祖致治三代之隆總攬群英得人一時之盛碩

儒既往卹制宜加故嘉議大夫太史令王恂雅德端方  
醇資淵懿學邃天人之祕運親神聖之逢嘉謀嘉猷有  
則入告于后先知先覺又將下被于民參儲闡調護之  
勤聞政府機密之奏望重漢廷之園綺職專堯典之羲  
和改曆授時日月星辰之順軌崇術造士詩書禮樂以  
移風太平立邦家之基正節折姦邪之氣朕承景命爾  
不同朝比觀嗣子之陳采切思賢之感章披雲漢識裕  
皇舊學之初誓指山河啓昭代新封于後華躋公袞諡  
易佳名於戲元氣所憑不存亡于生死九原可作尚哀  
榮于始終罔昧其承以昌厥續可贈推誠守正功臣光  
祿大夫大司徒上柱國追封定國公諡文肅

御史觀音寶贈諡制

李端

見危授命乃臣子之至忠崇德報功寔國家之令典表



茲竒節沛以新恩故監察御史觀音寶以才大夫爲真  
御史蚤給事于宿衛每供職于諫言殫輸向日之誠益  
厲飛霜之烈實封奏疏欲竭力以回天密邇姦人竟交  
讒而蠹國互激雷霆之怒誤罹斧鉞之誅凜雖死以猶  
生諒無善之不報於戲紫垣垂象正執法於星辰青簡  
流芳永爭光於日月尚期貞魄服我寵章可贈資德大  
夫御史中丞上護軍追封漁陽郡公諡貞愍

丞相伯顏祖考封諡制

宋誠夫

元宰立切懋贊千年之運大廷敷號紹開奕世之封泮  
流窮源積善必慶故中書右丞相伯顏祖考故千夫長  
阿剌沈毅而彊力忠勤而小心從役忽禪奮蛇矛而深  
入扈征蜀道裹馬革以長終質勞夙著於生平陰隲益  
隆於身後天開神聖闢中土而大同地隔江淮獨東南

之未下迺生孫子一我寰區肆加命數之隆用極崇  
之典位既登於師傅秩並進於階勲胙土分茅易名節  
惠于以舉公朝之憲度予以嚴私室之烝嘗於戲王父  
抱孫事業誕敷於闕闕天子建德恩元永賁於幽潛尚  
其有靈服之無斃可贈推誠佐理翊運以臣太傅開府  
儀同三司上柱國追封淮安王諡武康

丞相卜憐吉台封河南王制 程鉅夫

撫帝業之艱難爰思將帥啓以臣之盟誓宜及子孫咨  
爾在廷聽予作誥開府儀同三司河南江北等處行中  
書省左丞相卜憐吉台智明識遠一廣氣和勲名克篤  
於前人藩翰又勤於外服昔將平於內難朕大投艱方  
深計於中途卿獨決進志存弼亮身佩安危所謂社稷  
之臣盡享尊榮之報乃復煩於機務非示寵於忠良是



用命汝襲諸侯王以長守於富貴歸丞相印以自養於  
壽齡既不遠於京師可以時而朝觀允資重望坐鎮一  
方於戲表河之南念茲乃祖乃父為國之屏敬哉有土  
有民永延厥家毋棄朕命

文翰類選大成卷第一百三十七

文翰類選大成卷第一百三十八勅目錄

宋

歐陽永叔 二道

宋子京 一道

劉原父 一道

張方平 二道

蘇子容 一道

文翰類選大成卷第一百三十八勅目錄



文翰類選大成卷第一百三十八

左長史上海李伯璣編輯

紀善慈谿馮厚校正

勅類

宋

頒貢舉條制勅

歐陽永叔

夫儒者通天地人之理而兼明古今治亂之源可謂博矣然學者不得騁其說而有司務先聲病章句以牽拘之則吾豪雋奇偉之士何以奮焉有純明朴茂之美而無敦學養成之法飭身勵節者使與不肖之人雜而並進則夫懿德敏行之賢何以見焉此士人之甚弊而學者目以為患議者屢以為言朕慎於改更比今詳酌仍詔宰府加之參定以謂本學校以教之然後可求其



行實先策論則辦理者得盡其說簡程式則閑博者可  
見其材至於經術之家稍增新制兼行舊式以勉中人  
其煩法細文一皆罷去明其賞罰俾各勸焉如此則得  
士之意周取人之道廣夫遇人以薄者不可責其厚今  
朕建學興善以尊于大夫之行而更制革弊以盡學者  
之材予於教育之方勤亦至矣有司其務嚴訓道精察  
舉以稱朕意學者其思進德修業以無失其時凡所科  
條可為未制

賜右屯衛大將軍叔韶獎諭勅

朕固嘉汝嚮學勵善蔚然而有文與夫習富貴之驕而  
樂狗馬者之翫者異矣然夫學者所以知君臣父子之  
禮出可以施於國入可以施於家汝其慎擇厥師講教  
其闕使言行無過以自遠於悔尤夫能異於衆人誠為

有立必至乎君子然後大成汝其勉之無或中止

賜陝西四路沿邊經略招討都部署司勅

宋子京

朕卹軍旅之苦寵邊陲之良事從優寬情無遠愛至於  
常愆細過並許切除煩文苛法罕由吏議昨滕宗諒張  
亢並緣事任合給公用庫錢俾其宴享賓僚犒飫軍伍  
而乃用度無藝簿領失防陽託質營潛有牟入攸司言  
上遣使即推如聞逮繫頗多鞠劾彌廣本其冗費寧足  
深誅已罷案窮悉令原貸其滕宗諒等止免一官量降  
差遣雖屈吾法期慰士心且夫盡用市租羨推趙將來  
從我取誼表漢臣每慕前風思全大體尚慮諸道帥守  
便以茲事為懲或損狹餼牽或裁量藥餌苟存畏避謂  
免譏彈胡益至公亦非朕意但當循經費之式去有濶



之私取仰於官均惠於衆由茲底績夫何閒然安節坦  
懷毋或疑憚

罷諸路同提點刑獄使臣置轉運判官勅

劉原父

國家兼覆寓內疆理天下分州立邑十有八路惟吏之  
不平民之失職政之頗類獄之糾紛未能獨察也故設  
糾度之司使奉欽恤之寄專屬朝案貳以武吏誠欲審  
疑察枉釋冤決滯納民於不冤流化於無訟而武吏或  
起世家或由軍功文墨期會未必深究監司背項適增  
其繁夫非其習而望其効違其方而冀其功不亦難乎  
其罷諸路同提點刑獄使臣今樞密院勘會已及二年  
者即令赴闕未及二年者與就移合入差遣及於河北  
河東陝西緣兵馬多處相度添置路分都監以次補

用庶幾人盡所畏官不虛受夫轉運使之任所寄耳目  
治財賦集事功也江南東西荆湖南北廣南東西福建  
益梓利夔等十一路此其去京師遠者萬里近者數千  
里或跨帶山海崎嶇蠻夷而皆一貢主之處則無與參  
慮出則無與力設有緩急之警調輸之煩機會一失民  
受其弊甚非豫慮先事之策其各增置轉運判官一員  
以三年為一任選差第二任以上知州資序人候一任  
滿日與提點刑獄差遣初入知州及第三任通判資序  
人候滿兩任日與提點刑獄差遣若居部無狀隳職敗  
事亦重行其罰蓋士常惠任之不當其材無以見長用  
之不久其任無以就功今朕別異文武使得自試選擇  
賢能使得次進吾於士大夫可謂無負矣其各竭力悉  
心勉成功名布告中外咸諭朕意



復天下州縣官職田勅

張方平

昔在先帝詔復公田合王制班祿之差得聖人養賢之義載原深旨本自愛民比者搢紳之間屢陳利害之意以謂郡縣受地有無不齊銓審除負權利為倖辯競以之傷俗因緣至于害人故嘗命官斷以定數誠足釐於浮弊然未安於予懷禮不云乎厚祿以勸群臣則下之報禮重凡厥文武仕于朝廷雖廉素者惟十之尚而富貴者人之所欲其全寬大之體自有公平之制所宜給其所未給均其所未均約為等差槩令增足使事父母者得以致其養畜妻子者得以致其樂冠昏喪祭有所奉慶恤饋問有所施不牽私室之憂必專公家之慮則六計可以弊群吏之治四方可以期眾職之修儻自犯干有司亦何道於彝憲上廣先朝之惠示不敢渝下俾

諸臣之言審茲自定惟爾中外體予所存

條制資蔭勅

周禮大司樂掌學政以六藝教郡國子漢制光祿勳典任籍以四行察三署郎茲其官材本於世冒然當辨論必屬俊良今蔭法之所原古典刑之是憲惟因循之日久寢滋蔓而倖多敝生作法之涼濫起推恩之過且賞近于世諒非及於疎宗官惟其人顧何取乎髫稚暨階仕進之路復無誨育之科室不茨墉出不疆畝處不裕立身之道出不閑從政之方略觀貴途良鮮舊族此則上因朝廷法制之不立下自父兄訓義之不孚故俾宰司詳為定令使夫冢嗣先錄以篤為後之體支子限年以明入官之重設考藝之格激之向學立保行之條勅令率履前史不云爵祿者天下之砥石人君所以礪世



磨鈍茲實用焉庶乎位有稱職之才朝多濟世之美非  
惟為國造士是乃為臣立家咨爾具僚知朕此指

皇族出官勅

蘇子容

自我祖宗恒敘邦族大則疏封於爵土次則通籍於闈  
臺普集京師參奉朝請然而世緒寢遠皇朽益蕃屬有  
親疎則恩有隆殺才有賢否則祿有輕重今而一貫於  
周行是亦奚分於流別雖眩嫻之道誠廣而德施之義  
未周故廷臣數言宰司繼請謂宜定正限以等羣朕惟  
親戚之間經史有訓漢唐之世典故具存或以九族辨  
尊卑或以五宗紀遠近或聽推恩而分子弟或許自試  
而效才能或宗子之賢得從科舉或諸王之女自主昏  
姻盡前世之所行顧當今之未備况我朝制作動法先  
王豈宗室等衰反無定著因俾群公之合議將為一代

之通規載攬奏封具陳條目以謂祖宗貽穆宜從世世  
之封王公子孫抑有親親之義若乃服屬之既竭泊于才  
藝之並優在隨器以甄揚使當官而勉懋至於任子之  
令通昏之儀凡曰有司之常一用外官之法僉言既允  
朕意何疑告於將來遂頒明命噫自義率祖既殊升降  
之文因時制宜斯盡變通之利咨爾宗盟之眾固多博  
識之倫奉承新書當體朕意

文淵類選大成卷第一百二十八



文翰類選大成卷第一百二十九檄目錄

漢

司馬長卿 一道

魏

陳孔璋 二道  
鍾士季 一道

唐

程晏 一道  
樊鑄 一道  
駱賓王 一道

國朝

宋濂 一道  
王禕 二道

文翰類選大成卷第一百二十九檄目錄



文翰類選大成卷第一百二十九

左長史上海李伯璵編輯

紀善慈谿馮厚校正

檄類

漢

喻巴蜀檄

司馬長卿

告巴蜀太守蠻夷自擅不討之日久矣時侵犯邊境勞  
士大夫陛下即位存撫天下安集中國然後興師出兵  
北征匈奴單于怖駭交臂受事屈膝請和康居西域重  
譯納真稽顙來享移師東指閩越相誅右弔番禺太子  
入朝南夷之君西僂之長常效貢職不敢愾怠延頸舉  
踵喁喁然皆嚮風慕義欲為臣妾道里遼遠山川阻深  
不能自致夫不順者已誅而為善者未賞故遣中郎將



往賓之發巴蜀之士各五百人以奉幣帛衛使者不然靡有兵革之事戰鬪之患今聞其乃發軍興制驚懼子弟憂患長老郡又擅為轉粟運輸皆非陛下之意也當行者或亡逃自賊殺亦非人臣之節也夫邊郡之士聞烽舉燧燔皆攝弓而馳荷兵而走流汗相屬唯恐居後觸白刃冒流矢議不反顧計不旋踵人懷怒心如報私讎彼豈樂死惡生非編列之民而與巴蜀異主哉計深慮遠急國家之難而樂盡人臣之道也故有剖符之封析珪而爵位為通侯處列東第終則遺顯號於後世傳土地於子孫行事甚忠敬居位甚安逸名聲施於無窮功烈著而不滅是以賢人君子肝腦塗中原膏液潤野草而不辭也今奉幣役至南夷即自賊殺或亡逃抵誅身死無名謚為至愚恥及父母為天下笑人之度量相越豈不遠哉然此非獨行者之罪也父兄之教不先子弟之率不謹寡廉鮮恥而俗不長厚也其被刑戮不亦宜乎陛下愚使者有司之若彼悼不肖愚民之如此故遣信使曉喻百姓以發卒之事因數之以不忠死亡之罪讓三老孝悌以不教誨之過方今田時重煩百姓已親見近縣恐遠所谿谷山澤之民不徧聞檄到亟下縣道使咸喻陛下之意無忽

魏

為袁紹檄豫州

陳孔璋

左將軍領豫州刺史郡國相守蓋聞明主圖危以制變忠臣慮難以立權是以有非常之人然後有非常之事有非常之事然後立非常之功夫非常者故非常人所擬也曩者彊秦弱主趙高執柄專制朝權威福由已時



人迫脅莫敢正言終有望夷之敗祖宗焚滅汙辱至今  
未爲世鑑及臻呂后季年產祿專政內兼二軍外統梁  
趙擅斷萬機決事省禁下陵上替海內寒心於是絳侯  
朱虛興兵奮怒誅夷逆暴尊立太宗故能王道興隆光  
明顯融此則大臣立權之明表也司空曹操祖父中常  
侍騰與左悺徐璜並作妖孽饕餮放橫傷化虐民父嵩  
乞匄攜養因賊假位輿金登壁輸貨權門竊盜鼎司傾  
覆重器操贅閭遺醜本無懿德獯豸鋒協好亂樂禍幕  
府董統鷹揚掃除凶逆續遇董卓侵官暴國於是提劍  
揮鼓發命東夏收羅英雄棄瑕取用故遂與操同諮合  
謀授以裨師謂其鷹犬之才瓜牙可任至乃愚佻短略  
輕進易退傷夷折衄數喪師徒幕府輒復分兵命銳脩  
完補輯表行東郡太守領衮州刺史被以虎文

柄冀獲秦師一剋之報而操遂承資跋扈肆行凶忒割  
剥元元殘賢害善故九江太守邊讓英才俊偉天下知  
名直言正色論不阿諂身首被梟懸之誅妻孥受灰滅  
之咎自是士林憤痛民怨彌重一夫奮臂舉州同聲故  
躬破於徐方地奪於呂布彷徨東裔蹈據無所幕府惟  
彊幹弱枝之義且不登叛人之黨故復援旌擐甲席卷  
起征金鼓響振布衆奔沮拯其死亡之患復其方伯之  
位則幕府無德於兗土之民而有大造於操也後會鸞  
駕反旆群虜寇攻時冀州方有北鄙之警匪違離局故  
使從事中郎徐勛就發遣操使繕脩郊廟翊衛幼主操  
便放志專行脅遷當御省禁卑侮王室敗法亂紀坐領  
三臺專制朝政爵賞由心刑戮在口所愛光五宗所惡  
滅三族群談者受顯誅腹議者蒙隱戮百寮鉗口道路



以目尚書記朝會公卿充貢品而已故太尉楊彪典歷  
二司享國極位操因緣眦睚被以非罪榜楚參并五毒  
備至觸情任忒不顧憲網又議郎趙彥忠諫直言義有  
可納是以聖朝含聽改容加飾操欲迷奪時明杜絕言  
路擅收立殺不俟報聞又梁孝王先帝母昆墳陵尊顯  
桑梓松柏猶宜肅恭而操帥將吏士親臨發握破棺裸  
尸掠取金寶至今聖朝流涕士民傷懷操又特置發丘  
中郎將摸金校尉所過隳突無骸不露身處三公之位  
而行桀虜之態汙國虐民毒施人鬼加其細政慘何科  
方互設晉繳充蹊坑堦塞路舉手挂網羅動足觸機陷  
是以兗豫有無聊之民帝都有吁嗟之怨歷觀載籍無  
道之臣貪殘酷烈於操為甚幕府方詰外姦未及整訓  
加緒含容冀可彌縫而操豺狼野心潛包禍謀乃欲摧

捷棟梁孤弱漢室除滅忠正專為梟雄往者伐鼓北征  
公孫瓚彊寇桀逆拒圍一年操因其未破陰交書命未  
助王師內相掩襲故引兵造河方舟北濟會其行人發  
露瓚亦梟夷故使鋒芒挫縮厥圖不果耳乃大軍過蕩  
西山屠各左校皆束手奉質爭為前登犬羊殘醜消淪  
山谷於是操師震懼晨夜遁遁屯據敖倉阻河為固欲  
以塘螂之斧禦隆車之隧幕府奉漢威靈折衝宇宙長  
戟百萬胡騎千群奮中黃育獲之士騁良弓勁弩之勢  
并州越太行青州涉濟漯大軍汎黃河而角其前荊州  
下宛葉而倚其後雷震虎步並集虜庭若舉炎火以炳  
飛蓬覆滄海以沃爍炭有何不滅者哉又操軍吏士其  
可戰者皆出自幽冀或故營部曲感怨曠思歸流涕北  
顧其餘兗豫之民及呂布張揚之遺眾覆亡迫脅權時



苟從各被創夷人爲讎敵若廻旆方徂登高岡而擊鼓  
吹揚素揮以啓降路必土崩瓦解不俟血刃方今漢室  
陵遲網維弛絕聖朝無一介之輔股肱無折衝之勢方  
畿之內簡練之臣皆垂頭搨翼莫所憑恃雖有忠義之  
佐脅於暴虐之臣焉能履其節又操持部曲精兵七百  
圍守官闕外託宿衛內實拘執懼其篡逆之萌因斯而  
作此乃忠臣肝腦塗地之秋烈士立功之會可不勗哉  
操又矯命稱制遣使發兵恐邊遠州郡過聽給與彊寇  
弱主違衆叛舉以喪名爲天下笑則明哲不取也即  
日幽并青冀四州並進書到荊州便勒見兵與建忠將  
軍協同聲州郡各整戎馬羅落境界舉師揚威並匡社  
稷則非常之功於是乎著其得操首者封五千戶侯賞  
錢五十萬部曲偏裨將校諸吏者勿有所問廣宣恩

信班揚符賞布告天下咸使知聖朝有拘偏之難如律令

檄吳將校部曲

年月朔日子尚書令或告江東諸將校部曲及孫權宗  
親中外蓋聞禍福無門唯人所召夫見機而作不處凶  
危上聖之明也臨事制變困而能通智者之慮也漸漬  
荒沈往而不反下愚之蔽也是以大雅君子於安思危以  
遠咎悔小人臨禍懷佚以待死亡二者之量不亦殊乎  
孫權小子未辨菽麥要領不足以膏齊斧名字不足以  
跨譬猶鷺始生翰毛而便陸梁放肆顧行吠主謂爲舟  
楫足以距皇威江湖可以逃靈誅不知天網設張以在綱  
目爨鑊之魚期於消爛也若使水而可恃則洞庭無三  
苗之墟子陽無荆門之敗朝鮮之壘不判南越之旌不  
拔音夫差承闔閭之遠跡用申胥之訓兵棲越會稽可



謂彊矣及其抗衡上國與晉爭長都城屠於句踐武卒  
散於黃池終於覆滅身罄越軍及吳王淖驕恣屈強猖  
獗始亂自以兵彊國富勢陵京城太尉帥師南下滎陽  
則七國之軍瓦解冰泮澤之罵言未絕於口而丹徒之  
刃以陷其胷何則天威不可當而悖逆之罪重也且汪  
湖之衆不足恃也自董卓作亂以迄於今將三十載其  
間豪桀縱橫熊據虎踞彊如二袁勇如呂布跨州連郡  
有威有名者十有餘輩其餘鋒捍特起鷓視狼顧爭爲  
梟雄者不可勝數然皆伏鈇嬰鉞首腰分離雲散原燎  
罔有孑遺近者關中諸將復相合聚續爲叛亂阻二華  
據河渭驅率羌胡齊鋒東向氣高志遠似若無敵丞相  
秉鉞鷹揚順風烈火元戎啓行未鼓而破伏尸千萬流  
血漂櫓此皆天下所共知也是後大軍所以臨江而不

濟者以韓約馬超逋逸迸脫走還涼州復欲鳴吠逆賊  
宋建僭號河首同惡相救並爲脣齒又鎮南將軍張魯  
負固不恭皆我王誅所當先加故且觀兵旋旆復整六  
師長驅西征致天下誅偏將涉隴則建約梟夷旂首萬  
里軍入散關則群氏率服王侯豪帥奔走前驅進臨漢  
中則陽平不守十萬之師土崩魚爛張魯逋竄走入巴  
中懷恩悔過委質還降巴夷王朴胡賓邑侯杜濩各帥  
種落共舉巴郡以奉王職鉦鼓一動二方俱定利盡西  
海兵不鈍鋒若此之事皆上天威明社稷神武非徒人  
力所能立也聖朝寬仁覆載允信允文大啓爵命以示  
四方魯及胡濩皆享萬戶之封魯之五子各受千室之  
邑胡濩子弟部曲將校爲列侯將軍已下千有餘人百  
姓安堵四民反業而建約之屬皆爲鯨鯢超之妻孥焚



首金城父母嬰孩覆尸許市非國家鍾禍於彼降福於此也逆順之分不得不然夫鷲鳥之擊先高攫鷲之勢也牧野之威孟津之退也今者枳棘翦扞戎夏以清萬里肅齊六師無事故大舉天師百萬之衆與匈奴南單于呼完廚及六郡烏桓丁令屠各湟中羌棘蓬奮席卷自壽春而南又使征西將軍夏侯淵等率精甲五萬及武都氐羌巴漢統卒南臨汶江搃據庸蜀江夏襄陽諸軍橫截湘沅以臨豫章樓舡橫海之師直指吳會萬里尅期五道並入權之期命於是至矣丞相銜奉國威爲人除害元惡大慙必當梟夷至於枝附葉從皆非詔書所特禽疾故每破滅彊敵未嘗不務在先降後誅拔將取才各盡其用是以立功之士莫不翹足引領望風響應昔袁術僭逆王誅將加則廬江太守劉勲先舉其郡

還歸國家呂布作亂師臨下邳張遼侯成率衆出降還討眭固薛洪穆尚開城就化官度之役則張郃高奩舉事立以後討袁尚則都督一軍馬延故豫州刺史陰夔射聲校尉郭昭臨陣來降圍守鄴城則將軍蘇游仄爲內應審配兄子開門入兵旣誅袁譚則幽州大將焦觸攻逐袁熙舉縣來服凡此之輩數百人皆忠壯果烈有智有仁慈與丞相參圖畫策折衝討難芟敵寧旗靜安海內豈輕舉措也哉誠乃天啓其心計深慮遠審邪正之津明可否之分勇不虛死節不苟立屈伸變化唯道所存故乃建丘山之功享不訾之祿朝爲仇虜夕爲上將所謂臨難知變轉禍爲福者也若夫說誘甘言懷寶小惠泥滯苟且沒而不覺隨波漂流與燖俱滅者亦甚衆多吉凶得失豈不哀哉昔歲車在漢中東西懸隔合



肥遺守不滿五千權親以數萬之衆破敗奔走今乃欲  
當禦雷霆難以冀矣夫天道助順人道助信事上之謂  
義親親之謂仁盛孝章君也而權誅之孫輔兄也而權  
殺之賊義殘仁莫斯為甚乃神靈之逋罪下民所同讎  
辜讎之人謂之凶賊是故伊摯去夏不為傷德飛廉死  
紂不可謂賢何者去就之道各有宜也丞相深惟江東  
舊德名臣多在載籍近魏叔英秀出高峙著名海內虞  
文繡砥礪清節助學好古周泰明當世雋彥德行脩明  
皆宜膺受多福保乂子孫而周盛門戶無辜被戮遺類  
流離湮沒林莽言之可為愴然聞魏周榮虞仲翔各紹  
堂構能負析薪及吳諸顧陸舊族長者世有高位當報  
漢德顯祖揚名又諸將校孫權婚姻皆我國家良寶利  
器而並見驅逐雨絕於天有斧無柯何以自濟相隨顛  
沒不亦哀乎蓋鳳鳴高岡以遠爵羅賢聖之德也鸛鳴  
之鳥巢於葦苕苕折子破下愚之惑也今江東之地無  
異葦苕諸賢處之信亦危矣聖朝開弘曠蕩重惜民命  
誅在一人與衆無忌故設非常之賞以待非常之功乃  
霸夫烈士奮命之良時也可不勉乎若能翻然大舉建  
立元勳以應顯祿福之上也如其未能竿量大小以存  
易亡亦其次也夫係蹄在足則猛虎絕其蹠蝮蛇在于  
則壯士斷其節何則以其所全者重以其所棄者輕若  
乃樂禍懷寧迷而忘復闇大雅之所保背先賢之去就  
忽朝陽之安甘折苕之末日忘一日以至覆沒大兵一  
放玉石俱碎雖欲救之亦無及已故今往購募爵賞科  
條如左檄到詳思至言如詔律令

檄蜀

鍾士季



往者漢祚衰微率土分崩生民之命幾於泯滅我太祖  
武皇帝神武聖拓撥亂反正拯其將墜造我區夏高祖  
文皇帝應天順民受命踐祚烈祖明皇帝奕世重光恢  
拓洪業然江山之外異政殊俗率土齊民未蒙王化此  
三祖所以顧懷遺志也今主上聖德欽明紹隆前緒宰  
輔忠肅明允劬勞王室布政垂惠而萬邦協和施德百  
蠻而肅慎致貢悼彼巴蜀獨爲匪民敗此百姓勞役未  
已是以命授六師龔行天罰征西雍州鎮西諸軍五道  
並進古之行軍以仁爲本以義治之王者之師有征無  
戰故虞舜舞干戚而服有苗周武有散財發廩表閭之  
義今鎮西奉辭銜命攝統戎車庶弘文告之訓以濟元  
元之命非欲窮武極戰以快一朝之志故略陳安危之  
要其敬聽話言益州先主以命世英才興兵新野困躓

冀徐之郊制命紹布之手太祖拯而濟之興隆大好中  
更背違棄同即異諸葛孔明仍規秦川姜伯約屢出隴  
右勞動我邊境侵擾我氏羌方國家多故未遑脩九伐  
之征也今邊境又清方內無事蓄力待時併兵一向而  
巴蜀一州之衆分張守備難以禦天下之師段谷侯和  
沮傷之氣難以敵堂堂之陣比年已來曾無寧歲征夫  
勤瘁難以當子來之民此皆諸賢所共親見蜀侯見禽  
於秦公孫述授首於漢九州之險是非一姓此皆諸公  
所備聞也明者見危於無形智者規福於未萌是以微  
子去商長爲周賓陳平背項立功於漢豈宴安鳩毒懷  
祿而不變哉今國朝隆天覆之恩宰輔弘寬恕之德先  
惠後誅好生惡殺往者具將孫壹舉衆內附位爲上司  
寵秩殊異文欽唐咨爲國大害叛主讎賊還爲戎首咨



困偏禽獲欽二子還降皆將軍封侯咨豫聞國事壹等窮蹶歸命猶加上寵况巴蜀賢智見機而作者哉誠能深鑑成敗邈然高蹈投跡微子之蹤措身陳平之軌則福同古人慶流來裔百姓士民安堵樂業農不易畝市不迴肆去累卵之危就永安之計豈不羨與若偷安旦夕迷而不反大兵一放玉石俱碎雖欲悔之亦無及也各具宣布咸使知聞

唐

內夷檄

程晏

四夷之民長有重譯而至慕中華之仁義忠信雖身出異域能馳心於華吾不謂之夷矣中國之民長有倔強王化忘棄仁義忠信雖身出於華反竄心於夷吾不謂之華矣竄心於夷非國家之竄爾也自竄心于惡也豈

止華其名謂之華夷其名謂之夷耶華其名有夷其心者夷其名有華其心者是知棄仁義忠信於中國者即為中國之夷矣不待四夷之侵我也有悖命中國專僞不王棄彼仁義忠信則不可與人倫齒豈不為中國之夷乎四夷內嚮樂我仁義忠信願為人倫齒者豈不為四夷之華乎記吾言者夷其名尚不為夷矣華其名反不如夷其名者也

檄曲江水伯

大寶二載溺群公之故也

樊鑄

主張於地之血脉者豈不曰水伯乎爾自歎為身面為人控牽兩龍窟宅百谷億有祀矣故數倫於元氣之液弄權於坤輿之竅所云老而不死是謂之賊伊我謂爾有是夫何者二載二月春服既成冠者五六人才子六七人皆簸揚文精開闔武庫游嬉春晝泐泗江干興



飛壯心舞曳齒胃皆貧白龜之德不負赤鯉之本爾何  
為陰發暴殄潛生毒痛貴禍階於沙岸垣死府於花島  
如數子者皆載垂堂之誠爾始若懸流三十仞跳沫四  
十里固應尊而不親豈相及爾岸不萃岫流不唐突設  
人所倚之福陷爾孔易之誘俾水樹貫堅之功舫聲之  
如蝸塘捫空呼天迄死不救倏恣化魚之惡誰下拜牛  
之惠溺我國寶豈明時棄珠之泉沈彼綵船實玄夜藏  
舟之壑與夫覩右山四耳之夢潁川一角之人置子  
大江未匹斯甚使揭竿求父之子投牋請弟之兄奏箏  
篴傷妻之夫厲波濤徇婿之婦罹其凶害不忍荼毒並  
告無辜于上下神祇行哭失至於爾安乎爾今肆行賊  
虐者豈不謂性與習成乎何哉曩者溺孫興公於後湖  
之中淪炎帝女於東海之上化鼈於黃氏之母為魚於歷

陽之郡爾應恃以舊捷曼其後圖殊不知事不欲數數  
斯辱矣惡實已滿天命誅之然今歷視爾自昔為過之  
所或天涯或地岳起於侯甸之外且非輦轂之下豈比  
今日俯九門臨四達使哀聲悲響上及聰聽爾誰欺欺  
天乎然曲江者南峙仙閣北距靈宮足可効赤水產黃  
帝之珠胡為殲蒼生竊司命之契况之人也皆編中華  
俗游無河鄉所冀猛火烈山而莫焚大浸稽天而不溺  
既遇爾省括捨之中縱使飯術解漂之餌山經不沈之  
木豈可免爾之圖乎茲中江自首創至于今時數千里  
子更代易主島流波耗纔可接腋於井蛙詎持顛於海  
鼈爾之所處豈不狹隘乎人之所嘗豈有舳艫乎逮天  
寶載我皇恢土德以博之寶澤流以濬之積潤下之波  
瀾用濟川之舟楫豈不謂幸於爾也爾何滿以致溢凶



以自斃使彼都人士自此之後懼爾同夫神之海惡爾甚探手之湯匪徒歇爾盛事過自掇也雖悔可追然靈莫尊於君人時莫美於陽春君固愛人種德乘春宥罪省囹圄去桎梏爾奚得恃宅無聞括守有曲襲不辜於山嶽之候繫餘殃於積慶之家僕謂數子叫天曹訴地府黜爾主職在於斯須不然僕見欲上書於承明廬徵雷近速周處擊劍長逐孽波深搜爾居遁逃則用僥東請長臂者灑漉之又於雄棠北使長股者憑踐之不然邀離朱以視之命宋定以縛之然後調馬梅扇獸炭是烹是醢以報東門爾儻若混空隱形和水匿象則使牛曳蛇尾絕其本根縱逢山見彘毛終難必復矣僕亦宜念五六日至于旬時恐爾有詞曰予不誠視成不令而行故矢在弦上垂而未發儻能易轍僕則既往不咎若為

刻舟爾則何辭以對徐察爾變惟審圖之

為徐敬業討武明空檄

駱賓王

偽周武氏者性非和順地實寒微昔充太宗下陳曾以更衣入侍洎子晚節穢亂春宮潛隱先帝之私陰圖後房之嬖入門見嫉娥眉不肯讓人掩袖工讒狐媚偏能惑主踐元后於翬翟陷吾君於聚麀加以虺蜴為心豺狼成性近狎邪僻殘害忠良殺姊屠兄弑君鳩母人臣之所同嫉天地之所不容猶復包藏禍心窺竊神器君之愛子幽之於別宮賊之宗盟委之以重任嗚呼霍子孟之不作朱虛侯之已亡鸞啄皇孫知漢祚之將盡龍絜帝后識夏庭之遽衰敬業皇唐舊臣公侯冢子奉先君之成業荷本朝之厚恩宋微子之興悲良有以也哀君山之流涕豈徒然哉是用氣憤風雲志安社稷因天



下之失望順宇內之推心爰舉義旗以清妖孽南連百  
越北盡三河鐵騎成群王軸相接泐陵紅粟倉儲之積  
靡窮江浦黃旗匡復之功何遠班聲而北風起劍氣  
衝而南斗平喑鳴則山岳崩頽叱咤則風雲變色以此  
制敵何敵不摧以此圖功何功不克公等或居漢地或  
叶周親或膺重寄於話言或受顧命於宣室言猶在耳  
忠豈忘心一杯之土未乾六尺之孤何託儻能轉禍為  
福送往事居共立勤王之圖無廢大君之命凡諸爵賞  
同指山河若其眷戀窮城徘徊岐路坐昧先幾之兆必  
貽後至之誅請看今日之域中竟是誰家之天下  
國朝

擬漢使諭郡國共擊邯鄲檄

宋濂

惟高皇帝提三千卒起自豐沛赤熾一揮而天下底定累

洽重熙至于孝平皇帝藐在幼冲委制新都侯莽久東  
國鈞遂致潛萌異圖僭奸天位四海豪傑怨怒次骨至  
有枕戈待旦而弗寐者義旗始豎持劍之士動以萬數  
不一二年直搗長安眾共誅莽天地為之開明日月為  
之宣昭人祗為之邕舒爾吏民之所共知賊王郎者本  
邯鄲卜筮之家乘海內弗靖詐稱成帝子子輿以惑爾  
吏民趙魏亡賴男子遂立為帝徇下幽冀漢與賊決不  
兩立議將剪屠之今大司馬劉公將城頭子路刁子都  
兵百萬眾從東方來軍容之盛燁赫震蕩如雷如霆嬰  
其鋒者無不殞滅爾吏民皆漢舊臣當不忘二百年子  
養元元之澤帥爾子弟執爾戈矛鼓行而西相與成大  
功漢法具在陷陣却敵者受上賞褫旗斬將者次之執  
俘獻馘者又次之爾吏民隨所擇焉前之大將軍建立



殊績垂名竹帛者亦夫人也魯謂爾吏民弗能之乎亦  
在勗之而已其有不知逆順之辨甘爲賊虜敢持兵以  
從我者必草薶而禽獮之盡根株痛斷乃止耳爾吏民  
姑昧昧思之新莽篡立已十四年置百官有司謀臣甲士  
雄天下尚頸血濺地節解鬻分王郎以新集之衆假名  
烏合遇戰則鳥獸散其能與漢兵敵乎漢德在人心者  
未泯海內謳吟思之雖五尺童子日夜矯首以望赤帝  
旌旗之至故一叱咤間破昆陽之圍斬司徒之首拔武關  
之險降宛城之兵下河北之衆星流彗掃若神兵自天  
而下皆爾吏民目所親覩此無它天命所在有不可易  
也昔高皇帝嘗刑白馬盟諸侯王非劉氏而王者天下  
共擊之况王郎僭厥帝號反易天常罪決在不赦爾吏  
民上稽天命下度人心尚傳相告語戮力以誅無道使  
它日祀漢配天不失舊物爾吏民榮名無窮焉不然漢  
兵且至其無悔

漢太尉論七國檄

王偉

蓋聞君親無將將而必誅者春秋之誼爲非者天報以  
殃大易之道也昔我高皇帝既定天下懲亡秦孤立之  
敗於是剖裂疆土分二等之爵大封同姓侯者百餘邑  
尊王子弟大啓九國而是時昆弟少諸子又幼弱故孽  
子悼惠王王齊七十二城庶弟元王王楚四十城兄子  
濞王具五十餘城封三庶孽凡以廣親親之道固磐石  
之基也惟時諸王奄有民社固宜謹守職約作漢藩輔  
不顯亦世與漢室相久遠今具王濞乃稱首亂連諸國  
反豈漢釁有負於若等耶然當先帝之封濞也心固  
疑其有反相嘗諭之曰漢後五十年東南有亂豈若耶



然天下同姓一家慎無反渾頓首謝不敢及渾就國乃  
遂招致天下亡命公即山鑄錢煮海為鹽變亂法度復  
以太子故內懷怨望詐稱病不朝失藩臣禮於古法當  
誅有司數請其罪孝文皇帝寬容不忍因賜之几杖老  
不朝欲其改行為善德至厚也今不圖改過自新益肆  
驕恣背德蔑義壞先帝所建立與楚王戊趙王遂膠西  
王卬濟南王辟光菑川王賢膠東王雄渠約從謀反為  
逆無道起兵以危宗廟賊害大臣及漢使者迫劫萬民  
伐殺無罪燒殘室家掘發立隴為虐暴甚而卬等又重  
逆無道毀宗廟鹵御物皆干國之紀其罪不容誅幕府  
欽承皇帝制詔盡護諸將以大軍東向問罪七國惟爾  
七國皆劉氏懿親先帝所建立而同姓一家之諭言猶  
在耳縱不顧國家之法獨不念先帝之故畏其在天之

靈乎且七國反書以御史大夫龜錯變更律令侵削諸  
侯為辭皇帝量比天地信如日月不愛一人謝天下亦  
既誅錯以昭至公而七國兵不罷以此觀之意非徒欲  
誅錯明矣叛逆之罪上通于天今靈旗東指所謂應兵  
王者之師有征無戰者也計七國之地不能當漢十二  
顧乃糾合區區之眾而欲與大漢為敵譬猶履薄冰而  
待白日豈不殆哉如能解散前惡以先帝子孫骨肉為  
念請命降服者皆除其罪復故其間豪傑有能擒斬渠  
魁倡眾來歸及所在士大夫能慕義効忠戮力成功者  
封拜之科厥有令甲夫逆之與順禍之與福其趨不同  
判若白黑為逆而甘於屠戮孰與為順而受福功名富  
貴保于永世者乎禍福之原唯人所召毋狐疑猶豫為  
知幾者所姍笑檄到其善詳所處書不盡意



漢伏波將軍諭南粵檄

蓋聞天下之大義當混為一惟大漢隆興兼制八荒威稜所被罔不臣妾陛下即位厥既存撫天下輯安中國然後興師出兵從事于蠻夷是故有司臨境而東甌請服閩王服辜大將軍秉鉞單于奔幕票騎抗旌昆邪右衽自上古所未能攝正朔不及其俗者莫不詘膝受事稽首菜享甘心而內附惟南粵在服嶺南本南海地越佗故越吏秦滅天下亂佗輒擅據其地自立為王高皇帝已定天下為中國勞苦故釋佗不誅因而王之與剖符通使使和輯百粵為外臣及高后時南粵以我隔絕器物為辭乃自尊號為帝稱制與中國侔高后怒削去南粵籍遣兵擊之會國有大故兵罷孝文皇帝務以德懷柔四夷為佗親冢在真定置守邑其從昆弟咸尊官

厚賜寵之而遣使諭盛德焉佗恐頓首謝願奉詔長為藩奉貢職自削其帝制通使如故然聞其居國竊如故號特使天子時稱王朝命如諸侯而已天子寬容掩覆瑕玼亦置不問陛下建元之四年佗孫胡嗣為王而東粵侵其邊邑胡不敢擅興兵上書天子請命天子多南粵義守職約為興兵未至而東粵平胡感漢德且約入見天子已而背約不入見而遣子嬰齊入宿衛胡死嬰齊歸國立擅殺生自恣無道天子數使使者風諭亦竟負恩不復見天子及其子興繼立乃與母后謀求內屬上書請比內諸侯三歲一朝天子許之賜其相呂嘉印除其故重刑用漢法諸使者留鎮撫之則是大漢始終嘉惠于南粵者甚厚為南粵計其將何以報漢德乎頃者其王王太后能念漢恩不可負如約將入朝獨呂嘉



文翰類選大成卷第一百二十九  
久執國柄威福自專顧以內屬為非利於是天子遣兵  
及其境問罪遂以反聞弑其王王太后盡殺漢使者連  
蒼梧兵拒漢逆天悖道厥罪不可赦陛下赫然怒是用  
命將出師將盡誅夷之而郡縣其地雖其地方萬里廣  
袤有犀象翡翠玳瑁諸奇產然以大漢之強盛得其  
地不足以加大得其財不以為富徒以其罪稔惡貫義  
所當誅用宏混一之盛震耀我大漢威命於無垠幕府  
今受天子詔分命伏波將軍出桂陽下湟水樓船將軍  
出豫章下須水戈船將軍出零陵下離水下瀨將軍下  
蒼梧馳義侯發夜郎兵下牂何江咸會番禺殄滅之期  
決在今日蓋黃帝之兵非人之力天之福也惟爾南粵  
官屬將校部落君長其必劫於威暴汚染凶逆無以自  
新如能共棄前惡斬捕元凶相率來降封賞之料具如  
甲今夫玉石俱焚誠聖天子所不忍用是播告之脩不  
匿厥指苟或保持險阻懷抱疑貳以自外我天子之威  
命則天兵所至職在討除必草薶而禽獮之盡殺乃止  
禍福所在昭然甚明檄到咸諭陛下意毋忽

文翰類選大成卷第一百二十九



文翰類選大成卷第一百四十冊謚目錄

漢

武帝 一篇

潘元茂 一篇

齊

謝玄暉 一篇

唐

賈曾 一篇

賈幼鄰 一篇

陸敬輿 一篇

權載之 一篇

李待價 一篇

宋

范文素 一篇

歐陽永叔 一篇

王禹玉 一篇

元

姚端甫 一篇

王磐 一篇

王構 一篇

陳儼 一篇

閻丁靜 一篇

張士觀 一篇



袁伯長 一篇

虞伯生 一篇

文翰類選大成卷第一百四十冊謚目錄

文翰類選大成卷第一百四十

左長史上海李伯璣編輯

紀善慈谿馮厚 校正

冊謚類

漢

封廣陵王冊 武帝

嗚呼小子胥受茲赤社建爾國家封于南土世世為漢  
藩輔古人有言曰大江之南五湖之間其人輕心揚州  
保彊三代要服不及以正嗚呼悉爾心祗祗兢兢迺恭  
迺順母相好逸母邇宵人惟法惟則書云臣不作福不  
作威靡有後羞王其戒之

魏王九錫冊

潘元茂

名藩陳留中  
年尚書左丞

制詔使持節丞相領冀州牧武平侯朕以不德少遭閔



凶越在西土遷于唐衛當此之時若綴旒然宗廟之祀社稷無位群凶覬覦連帶城邑一人尺土朕無獲焉即我高祖之命將墜於地朕用夙興假寐震悼于厥心曰惟祖惟父股肱先正其孰恤朕躬乃誘天衷誕育丞相保乂我皇家弘濟于艱難朕實賴之今將授君典禮其敬聽朕命昔者董卓初興國離群后釋位以謀王室君則攝進首啓戎行此君之忠於本朝也後及黃巾反易天常侵我三州延于平民君又討之翦除其迹以寧東夏此又君之功也韓暹楊奉專用威命又賴君勲尅黜其難遂建許都造其京畿設官兆祀不失舊物天地鬼神於是獲乂此又君之功也袁術僭逆肆于淮南懼憚君靈用丕顯謀蕪陽之役橋蕤授首稜威南厲術以殞潰此又君之功也迴戈東指呂布就戮乘軒將返張揚

沮斃駐固伏罪張繡稽伏此又君之功也袁紹逆常謀危社稷憑恃其眾稱兵內侮當此之時王師寡弱天下寒心莫有固志君執大節精貫白日奮其武怒運諸神策致屈官度大戮醜類俾我國家拯於危墜此又君之功也濟師洪河拓定四州袁譚高幹咸梟其首海盜奔迸黑山順軌此又君之功也烏丸三種崇亂二世袁尚因之逼據塞北東馬懸車一征而滅此又君之功也劉表背誕不供貢職王師首路威風先逝北城八郡交臂屈膝此又君之功也馬超成宜同惡相濟濱據河潼求所逞欲殄之渭南獻馘萬計遂定邊城撫和戎狄此又君之功也鮮卑丁令重譯而至單于白屋請吏帥職此又君之功也君有定天下之功重以明德班敘海內宣美風俗旁施勤教恤慎刑獄吏無苛政民不回慮敦



崇帝族援繼絕世舊德前切圖不咸秩雖伊尹格于皇  
天周公光于四海方之蔑如也朕聞先王並建明德昨  
之以土分之以民崇其寵章備其禮物所以蕃衛王室  
左右厥世也其在周成管蔡不靖懲難念功乃使邵康  
公奭齊太公履東至于海西至于河南至于穆陵北至  
于無棣五侯九伯實得征之世祚太師以表東海爰及  
襄王亦有楚人不供王職又命晉文登為侯伯錫以二  
輅虎賁鈇鉞拒鬯弓矢大啓南陽世作盟主故周室之  
不壞繫二國之是賴今君稱丕顯德明保朕躬奉答天  
命導揚弘烈緩爰九域罔不率俾功高乎伊周而賞卑  
乎齊晉朕甚惡焉朕以眇身託於兆民之上永思厥艱  
若涉淵冰非君攸濟朕無任焉今以冀州之河東河內  
魏郡趙國中山鉅鹿常山安平甘陵平原凡十郡封君

為魏公使使持節御史大夫慮綬君印綬用書金虎符  
第一至第五竹使符第一至第十右錫君玄土首以白  
茅爰契爾龜用建冢社昔在周室畢公毛公入為卿佐  
周邵師保出為二伯外內之任君實宜之其以丞相領  
冀州牧如故今更不傳璽肅將朕命以允華夏其上故  
傳武平侯印綬今又加君九錫其敬聽後命以君經緯  
禮律為民軌儀使安職業無或遷志是用錫君大輅戎  
輅各一玄牡一駟君勸分務本畜民皆作粟帛滯積大  
業惟興是用錫君衮冕之服赤舄副焉君敦尚謙讓俾  
民興行少長有禮上下咸和是用錫君軒懸之樂六佾  
之舞君翼宣風化爰發四方遠人回面華夏充實是用  
錫君朱戶以居君矧其明哲帝所難官才任賢群善  
必舉是用錫君納陛以登君秉國之均正色處中纖毫



之惡靡不抑退是用錫君虎賁之士三百人君糾虔天  
刑章厥有罪犯關于紀莫不誅殛是用錫君鐵鉞各一  
君龍驤虎視旁眺八維掩討逆節折衝四海是用錫君  
彤弓一彤矢百絃弓十絃矢千君以溫恭為基孝友為  
德明允篤誠感乎朕思是用錫君柎鬯一卣珪璜副焉  
魏國置丞相以下群卿百僚皆如漢初諸王之制君往  
欽哉敬服朕命簡恤爾眾時亮庶功用終爾顯德對揚  
我高祖之休命

齊

明皇帝謚冊

謝玄暉

維永泰元年九月朔日哀子嗣皇帝諱仰惟大行皇帝  
早棄萬邦聖烈方遠式尊帝世俾鬯鴻猷咸以為無名  
以化則言繫莫宣其道有求斯應則影響庶同其功所

以求言配命寄心宗極光昭令德允樹風聲伏惟大行  
皇帝令信四時齊光日月創光大於登庸通神機於授  
命因時以惕藉九萬而輕舉天保既定運四海而高臨  
及乃開物成務重維國綱風行草化心往如神左賢右  
戚內樂外禮輯五材以教民申三驅而在宥用能盛德  
殷薦美善斯畢皇矣之美既字蒸我之道咸備景化方  
遠猷世在天靈筮告期遠日無改仰則前王俯詢百辟  
累德稱睿允極鳴名謹命某申奉太牢之奠謹上尊謚  
曰明皇帝廟號高宗天人允協神其尚饗嗚呼哀哉

唐

玄宗明皇帝冊

賈曾

朕以寡昧虔奉鴻休本殊王季之賢早達延州之節昔  
者聖曆已讓皇嗣之尊暨至神龍終辭大弟之授豈惟



衣冠所覩抑以兆庶咸知頃屬國步未夷時艱主幼大業有綴旒之懼寶位深墜地之憂議迫公卿遂司契象日慎一日以至於今一紀之勞動亦至矣萬邦之俗化漸行矣將成夙願朕寔寰區昔堯之禪舜惟能是與舜以命禹匪私其親神器之重允歸公授皇太子某有大功於天地定阡危於社稷温文既習聖敬日躋委之監撫已移年歲時政益明庶工惟序朕之知子庶不負時曆數在躬宜陟元后可今即皇帝位有司擇日授册朕方比迹洪荒希風太皇神與化遊思與道合無為無事豈不羨歟王公百寮宜識朕意

肅宗宣皇帝册

賈幼鄰

維天寶十五載歲次丙申月戊子朔二十一日戊申太上皇若曰咨爾元子某惟天為大惟人君則之順乃德

故舜禹揖讓而履皇極嗚乃道故丹朱商均不能保洪業是以啓有惠迪而夏嗣焉隋有亂紀而唐受焉五聖之御寓皆以勤儉兢業日慎一日故能享祐長久垂慶無窮洎于六葉恭位四海馱于勤倦緬慕汾陽將保靜頤神思我烈祖玄元之道是用命爾元子當位嗣統於戲爾有忠孝之誠極于君父爾有友愛之義信于兄弟爾有仁恕之行通于神明爾有戲難之才彰于兆庶予懋乃懿德嘉乃神武天之曆數在爾躬汝惟推誠禍亂將興爾永清汝惟從諫宗社將興爾復寧佞言惟疵直言惟師任賢勿貳去邪勿疑民非后孰治后非賢罔與守邦欽哉慎乃有位無忝我祖宗之不烈矣

告謝昊天上帝册

陸敬輿

維貞元元年歲次乙丑十一月癸巳朔十一日癸卯嗣



天子臣某敢昭告于昊天上帝顧惟寡昧不克明道不  
膺眷命俾作神主常恐獲戾上下而播災於人兢兢業  
業夙夜祗畏居位五祀德馨蔑聞皇靈不歆是用大儆  
殷憂播蕩踰歷三時誠懼烈祖之耿光墜而不耀側身  
思咎庶補將來上帝顧懷誘衷悔禍勦兇慝之凌暴  
人神之憤恥舊物不改神心載新茲乃九廟遺休兆人  
介福以臣之責其何解焉聞屬寇虞久稽告謝今近郊  
甫定長至在辰謹以玉帛犧齊粢盛庶品冀憑禋燎式  
薦至誠太祖景皇帝配神作主尚饗

德宗皇帝謚冊

權載之

維永貞元年歲次乙酉十月丙申朔孝孫嗣皇帝臣某  
伏惟大行皇帝德合天地作人父母纂承光明建用皇  
極昔在寶應制天下賦輿咸藩以大自然魯疏雍師律既

貞會陝收洛克輝威命廓開王塗是登上嗣乃宅丕后  
服藝祖神宗之大烈有乾乾翼翼之至敬敷佑迪拓尊  
嚴懿恭燭明四極發育萬物濯沐乎仁澤澄清乎理本  
巍巍乎建中風聲與貞觀同符洎時有稷沴變生京轂  
省方履薄弘陰隲之功整旅致誅申震懼之令鷓誼滅  
息侯王執道不冒持載鏡清砥平然後明禋祀萬靈  
以接翕受敷施九德咸事含弘亭毒以致其和博采虛  
受以通其志政刑有箴宸扆有銘煥乎文明之化成也  
因時創節象卦設樂薰然中和之被物也納嘉言於近  
侍輟已行之詔疾讒口於霄人宥過誤之罪去徽號而約  
已正廟祧而尊祖九譯通道萬方來庭實旅焯乎勛籍  
夷歌陳於樂府霜露所墜車書大同順氣旁達天休滋  
至慶霄輪困德水清激三辰秉陽以宣耀百嘉麗地而



交感飛走呈祥肖翺遂性在宥天下二十有七年夫文  
思光被陶唐之盛也惜怛忠利虞帝之教也亶亶穆穆  
周文之業也聰明神武漢祖之烈也窮古先之大律極  
帝者之上儀方將扈開崇立待檢王謀奄遺天命永棄  
萬方億兆嗷嗷哀號靡訴顧惟冲昧懼忝孫謀君父有  
命付茲神器虔恭貽訓感慕滋深今因山既建同軌畢  
至一二元老宗工碩生考稱天之禮稽節惠之法式遵  
古義敢薦大名謹遣攝太尉門下侍郎平章事杜黃裳  
謹奉册上尊謚曰神武孝文皇帝廟曰德宗伏惟聖靈  
昭格膺是典禮幽贊丕祉流干無窮嗚呼哀哉

文宗皇帝謚册

李待價

名珪拜相

維開成五年歲次庚申七月乙亥朔十一日乙酉哀弟  
嗣皇帝臣伏惟大行皇帝德開上玄功定內難百辟勸

進萬姓樂推洎順人撫運嗣統立極凝旒建大中之道  
執契弘無爲之化聰明天縱孝敬日新翼翼承九廟之  
祭蒸蒸奉三宮之養以文思光赤縣以武德澄滄海慈  
儉厚下端莊肅物達聰無不察黜績若不知成湯之六  
事罔憊大禹之九功咸序學無常師惟恪王是式仁必由  
己以蒼生爲心修雅樂而簫韶成音戒逸遊而靈囿望  
幸遏外夷之教羈縻殆絕舉中古之典汪洋勃興宮禁  
無私恩嬪嬙無侈服每宰臣伏奏卿士宴見論道何啻  
於日旰恤刑已至於歲減大闢諫路深排倖門危言激  
訐惟理是聽匪唯納之而又賞之密成貴寵惟法是訓  
匪唯誠之而又繩之貞符秘瑞王者之所寶郡國承認  
寢而不揚鴻名徽號列聖之所重臣寮抗疏約而不受  
興起儒術修明祀事刻經誥之琬琰真宗廟之琮璜雞



鳴而起孜孜於眾善日入而息矻矻於群書敦敘九族  
厚戚藩之恩協和萬邦惇戎狄之信至公不私於天性  
體道必從乎人欲應變懸解知機如神日者數逢倣攝  
星有謫見克己脩德側身勵政和人心以保乂謹天戒  
而來祥復貞觀之故事編開元之政要旌別淑慝澄清  
品流一物失所必形於睟容百姓未康每勞於聖慮聽  
政餘力游藝緣情採二南之風雅窮六義之教化汾水  
著韶栢梁變體腴雋人口馨香國風南山崇崇京國之  
望不列祀典縣千百年舉神授職發自精懇興雲致雨  
響應虔祈至於出宮人放鷲鳥太官節重味之膳外府  
減外土之貢開倉賑乏平糶卹饑蟲螟不爲災水潦不  
成沴日月臨照天地含弘肖翹蠢蠕樂生遂性稽帝王  
之能事鄙封疆之虛羨超邁二五度越聖賢繇是四夷

八蠻圖不庭九州六合圖不順在宥天下十有五年於  
戲身居九重心遍四海日用憂濟時臻洽平刑悴神勞  
至于大漸啓金滕而無驗憑玉几而有命顧屬冲昧不  
承寶圖祗奉神器不克荷今因山戒期復土備禮痛深  
手足哀結精靈呼天碎標觸增感夫謚者行之迹號  
者功之表採鴻生之議從公卿庶尹之請考彼古  
道易茲大名對越昊窮式揚徽烈謹遣太尉中書侍郎  
司中書門下平章事李玕謹奉册上尊諡曰元聖昭獻  
孝皇帝廟號文宗伏惟睿靈昭格膺受茂典陰隲宗社  
介福無窮嗚呼哀哉

宋

乾德上尊號册文

范希文

維乾德元年歲次癸亥十一月己酉朔十六日甲子攝



太尉守司徒兼侍中蕭國公臣質守司空平章事臣溥  
尚書右僕射平章事臣仁浦及内外文武臣寮馬步諸  
軍將校藩郡守臣四夷君長緇黃耆艾等七千五百人  
謹再拜稽首上言曰惟天爲大惟堯則之又曰舜有天下  
無爲而理是以古之言道德者莫先於二帝一則曰聰  
明文思一則曰溫恭潛括英聲茂實意無欲而自彰景福  
鴻休心無求而自至巍巍蕩蕩可得而言伏惟皇帝陛  
下高明博厚宣慈惠和純粹之德全孝友之行著惟精  
惟一知微知章向者龍尚處於潛淵日未離於暘谷歷  
試之際志在扶危險阻艱難何往不濟躍馬蹈高平之  
陣麾戈佐淮甸之征喋血鏖兵一月三捷勞旋飲至論  
功莫二洎乎天監厥德用集天命人祇叶應風雨咸若  
鼎運初建國步猶梗始則李筠犯順長戟指闕并人連

禍寇我北鄙於是以太行之行重進怙亂棄德崇奸幅  
員千里生民被毒於是有廣陵之役千乘萬騎如霆如  
雷詢彼仇方震疊區宇翠華宵至堅城曰下連平二孽  
有同符契累朝已來出師誅暴未有若茲之竒速也頃  
者華風不競中國政微五嶺三江置諸度外殊文異軌  
六紀于茲肇啓聖謀驅攘寇亂荆湖底定南土晏然燕  
薊之戎汾晉之孽燕巢幕上朝不謀夕邊事少閒理道  
無壅嚴恭寅畏一日萬機勤於已而泰於人儉於躬而  
豐於物明四目而高視達四聰而遠聽不侮鰥寡恤天  
窮也信及豚魚遂物性也惜力念耕耘之苦推食閔介  
胄之勞法家之流旣峻且密乃詔大理重正刑名俾盡  
哀矜務從寬簡減盜竊之罪緩鹽麴之禁好生之德通  
于神明若乃昧爽不顯坐而待曰商湯之戒慎也側身



損己長轡遠馭漢文之化導也循名責實信賞必罰建  
武之法制也果敢決斷從善如流貞觀之風烈也帝王  
之道於茲備矣太平之業於茲成矣於是祇見清廟致  
其孝享圓立展禮對越上玄一獻而天帝降祉再獻而  
神人以和三獻而萬祿攸報祥風拂袂休氣繞壇熙熙  
怡怡群心胥悅國家大慶衆庶共之肆赦覃恩俾民更  
始與天合道謂之應天大無不覆謂之廣遠無不至謂  
之運博施濟衆謂之仁智周萬物謂之聖化成天下謂  
之文保大定切謂之武其德無際謂之至德臣等不勝  
大願謹奉玉冊玉寶上尊號曰應天廣運仁聖文武至  
德皇帝伏惟垂日月之明監億兆之情凝旒端委昭受  
鴻名如山嶽之固如松柏之貞乾健不息品物咸亨承  
天之祐萬壽千齡

尊皇太后冊

歐陽永叔

維治平二年歲次乙巳十一月丁巳朔十有六日壬申  
嗣皇帝臣某謹稽首再拜言曰臣聞昔者明王之以孝治  
天下者非家至而日見也蓋有要道焉推所以行於已  
者爲天下率盡所以奉其親者爲天下先而四海靡然  
而承風矣洪惟有宋受命造邦百年四聖而小子獲承  
之以繼我仁考之遺休餘烈方與群公卿士夙夜以思  
勉其不逮庶幾如我仁考付畀之意以申罔極欲報之  
心此固慄慄祇懼不敢違寧者也顧惟眇末之質提攜  
鞠育慈仁咻煦至于有成自我聖母嗣位之始哀迷在  
疚而憂勤艱難一日萬務協和綏靜保佑扶持功施邦  
家亦惟我聖母求惟至恩大德無物可稱是以稽參典  
禮率籲群心合志一辭懇懇惓惓不勝大願謹遣攝太



尉具官韓琦司徒具官胡宿奉玉册金寶上尊號曰皇  
太后恭惟皇太后聖善明拓柔閑靜專粵自正位中宮  
內助先帝陰禮脩而教行儉德著而下化遂及萬國先  
於正家逮夫玉几受遺遭時多難勉徇勤請權同聽決  
而明識遠慮動懷謙畏深鑑漢家母后之失訖不踐於  
外朝及歸政冲人合於易之進退不失其正之聖是惟  
全節詎羨固已超出前古而垂法後世宜乎聖烈播于  
聲詩尊名光於典册惟末小子獲奉温清嗚呼殫九州  
之富以為養未足盡於孝心享萬壽之福而無疆期永  
承於慈訓臣誠懼誠忭稽首再拜謹言

仁宗皇帝加上徽號册

王禹玉

維元豐六年歲次癸亥十一月壬寅朔二日癸卯孝孫  
嗣皇帝臣謹再拜稽首言曰臣伏觀古先拓王莫不大

名發於前而大惠昭於後其法皆本於至公而不可易  
至後世臣子又欲盡報上之道以謂君德甚盛其言不  
足以包眾美於是有至郊加誅之文夫欲推事存之禮述  
追遠之志則奉素享之榮號益新紀之鴻烈謀群公請  
太室洋洋率際天接地而震顯之不亦當靈心而傳古誼  
乎恭惟仁宗神文聖武明孝皇帝躬清明之資賦神睿  
之略乾行施之不息仁性根於自然時乘六飛端御大  
器知窮八荒而不見其迹澤及萬彙而不居其功爾乃  
簡拔畷賢放遠邪佞宥恕刑獄懷保鰥寡賞不徇所私  
罰必當于理興農桑之本務緝禮樂之墜文有慘怛好  
生之心吏或誤入重辟必終身見斥有寬裕從諫之度  
言者屢進狂直必曲意見容念兵革之傷夷則不殺而  
服念稼穡之勤勞則圖寧于逸矧履天下之尊而持之



以抑畏饗天下之富而寶之以儉素輿馬不聞於游盤  
鍾鼓不涉於閒燕宮室亡奢靡之飾器服亡瓌竒之玩  
加以夙夜齊臬事天之誠盡霜露怵惕念親之感深方  
朝廷之久安迺大革因循而聖政又新為社稷之重計  
迺前定禍亂而皇嗣蚤立故四十二年仁恩川流涵濡  
熏蒸格于上下日月華風雨均四時和百穀蕃北有獫  
狁而不能驕西有黠羌而不能軼虫魚遂性自安川藪  
之游男女潔誠更趨耕織之樂固有幽遐荒昧之俗不  
約而子來竒偉倜儻之瑞不期而特見者矣不赫哉憲  
度鴻明聲文沛施自載籍之傳蓋未有休功盛業可加  
于茲也重循涼菲永念猷訓今將款清廟陟紫壇遂受  
厚福以浸黎元宜于此時臨彤庭發玉版上不敢墮祖  
宗之典下不敢虧神民之情如堯如舜如禹如湯豈不

一卅之眷而流萬世之聲哉爰飭上儀載揚景鏢謹  
遣銀青光祿大夫守尚書左僕射兼門下侍郎上柱國  
太原郡開國公食邑七十六百戶食實封二千五百戶  
王珪奉玉冊玉寶加上徽號曰仁宗體大法道極功全  
德神文聖武濬哲明孝皇帝恭惟明德在天臨受徽稱  
維億萬年永錫嘉祉謹言

立夏國主冊

維熙寧二年歲次己酉三月戊辰朔十四日辛巳皇帝  
若曰於戲昔堯合萬邦而民風和周建列土而王業赫  
若古申命蓋國家之成法也咨爾秉常迪性純壹飭躬  
靖虔生稟山川之靈舊傳弓鉞之賜撫有西夏尊于本  
朝知事君必盡其節知守國當保其衆乃內發誠素外  
孚擔言質之天地而不欺要之日月而不昧朕用稽酌



故典表顯徽實錫爾以茅土之封不為不寵加爾以車服之數不為不榮消辰既良備物既渥誕舉丕冊以華一方今遣朝奉郎守尚書司封郎中上輕車都尉賜紫金魚袋劉航文思副使銀青光祿大夫檢校太子賓客兼御史大夫騎都尉彭城縣開國伯食邑七百戶劉怵持節冊命爾為夏國主為宋藩輔夫禮謙順者靡不膺長福懷驕肆者靡不蹈後虞率身和民時乃之績往欽我祇予一人之彝訓可不慎歟

元

皇帝尊號玉冊

姚端甫

維至大二年正月乙酉朔越七日辛卯皇太子中書令樞密使臣某謹率中外文武百僚頓首頓首謹言昔我世祖既平炎趙質之於書幅員廣長振古無倫覆燾之

下八紘萬國莫敢不庭何獨一王西北岸然憑道阻脩方命正朔德緼之而不摯威董之而不警夫豈不能聲罪致罰采入其地終以聖仁親其宗親包荒有年成宗繼序憤久驚頑天鑑昭明於裕皇孫獨異陛下授以太祖皇帝信寶撫軍漠北是固以張足付神器之本時未及冠承命即行具視萬里莽間寒冽之鄉不遠不難如堂適庭至則獎厲諸君脩明法制簡拔果毅均苦分勞解衣燠寒推食飫飢洗洗汔汔士氣日作睿筭伐謀待寇竄至集人以先身踐戎行霆馳電擊大北其群虛已不矜日慎一日始終十年不狃屢勝狂狡不懲悉統來加當以選鋒伺閒出奇盡襲輜重彷徨無歸度不能並老倪纍纍降口百萬致茲救寧平四十年未靖之梗成兩祖宗未究之志天下之人聞其風聲思覩天光者顯



顯翹翹九圍一心握是乾符歸正宸極弛武事之風習  
洽新化以文治立愛自親曾未旬浹上尊太后問安以  
時丁建儲宮庶政是先又舉列聖未遑之典欽崇示祀  
王瓚黃流薦裸太室還蹕龍興徘徊太祖龍旂九存蓄  
金子斯肇基帝業為城中都又以孔子垂範百王將一  
千年而顯謚未稱加大成於至聖又宣王上立勞于軍  
與凡庭臣悉大賚之閒歲不登既賑既恤虞施未博民  
罹非咎再肆大宥至德難名赫赫巍巍惟天為大掛一  
漏萬井觀如斯求可盡臣下歸羨報上者惟是徽稱謹  
奉玉冊玉寶上尊號曰統天繼聖欽文英武大章孝皇  
帝欽惟陛下立心天地立極生民茂對鴻名于億萬年

皇后冊

王磐

維至元十年歲次癸酉三月甲寅朔十三日丙寅皇帝

若曰天地合德故能覆載萬物而不遺日月並明所以  
照臨六合而無外至哉夫婦之大義實配陰陽之兩儀  
咨爾皇后弘吉烈氏戚里名家元勳貴族備儀率禮令  
德來嬪自朕奉藩之初至于踐阼之日明識遠慮裨益  
宏多雖緯翟正位于長秋而典冊未光于大禮茲者文  
臣敷奏寔應朕心今遣攝太尉中書右丞相安童持節  
授爾玉冊寶章備物充庭式遵古典於戲恭順接下九  
族形雍睦之風儉素相高萬世衍靈長之福服茲寵命  
益懋徽猷

太祖皇帝加上尊號冊

王構

維至大二年歲次己酉某月某日孝曾孫嗣皇帝臣等  
謹再拜稽首言伏以恢皇綱廓帝絃建萬世無疆之業  
鋪宏休揚偉績遵累朝已定之規式當繼統之元蓋有



稱天之誅孝弗忘于率履制庸謹于加崇欽惟太祖聖  
文皇帝陛下淵量聖姿睿謀雄斷沛仁恩而濟屯厄振  
羈策以馭豪英惟解衣推食于初年見君國子民之大  
略玄符顯握諸部悉平黃鉞載麾百城隨下裔二兼收  
于夏孽餘波克殄于金源蕩蕩乎無能名迹遠追于湯  
武灝灝爾其為訓道允協于唐虞根深峻嶽而維者四  
焉囊括殊封而統之一也肆予小子承此丕基兩祗見  
於太宮恒浚臨於端展祚垂鴻兮錫裕尚期昭報之申  
牒鏤玉以增輝敢綴彌文之舉謹遣某官某奉玉冊玉  
寶加上尊謚曰法天啓運聖武皇帝廟號太祖伏惟威  
靈昭假景貺潛臻闡繹吾元與天並久

皇太后冊

陳儼

維至元三十一年歲在甲午十一月丁未朔皇帝臣某

謹稽首再拜言曰臣聞自家而國治道必有所先立愛  
惟親君德莫加於孝况恩深於鞠我而禮重於正名歷  
代以來令儀可考人子之職所在天下之母宜尊恭惟  
聖母聖善本乎天資靜專法乎地道上以奉宗祏之重  
下以敘倫紀之常助我前人守卷耳憂勤之志保予冲  
子成思齊雖肅之風肆神器之有歸知孫謀之素定昇  
付雖由於曆數規模一出於庭闈是用率籲眾心章明  
鉅慶不勝拳拳大願謹奉冊寶上尊稱曰皇太后伏惟  
長信穆穆周宗繇繇備洛書之錫福粲慈極之儀天璫  
圖寶運於萬斯年誠歡誠忭稽首再拜

皇太子冊

閻子靜

皇帝若曰祖宗聖緒恭承丕顯之謨兄弟懿親宜正示  
良之號立天下之大本示天下以至公咨爾皇太子某



德器淵深英姿玉粹武奮清宮之偉績文參定策之殊  
勲豈特華萼交輝之情式相好矣其在鳧鷖守成之治  
須汝贊之故於連枝同氣之間付以監國撫軍之任於  
上承於母意蓋允出於朕心已於六月朔旦面授爾皇  
太子金寶今復遣攝太尉丞相塔思不花持節授爾王  
冊維寵命之存膺尚謙恭而自牧益盡寧親之孝益勤  
事上之忠以敦九族內睦之風以衍億祀無疆之慶

仁宗皇帝謚冊

士觀

維延祐七年歲次庚申八月丁未月十日丙辰孝子  
嗣皇帝臣某謹再拜稽首言臣聞觀其謚而知其行著  
王者之否稱禮于廟而誅于郊寔邦家之彝典雖天地  
之大莫能擬議而臣子之情宜極形容爰體至公式揚  
景鑠欽惟大行皇帝常聰明冠古勇智自天初大德之陟

遐生內釁於不測乃從潛邸獨運聖謨正神器於幾危  
定乾維而重構豐功盛烈奮立一時偉望英聲揚溢四  
海尋被武皇之歷試納于大麓以弗迷由母弟之懿親  
膺元良之重寄取法裕廟主鬯之道隆奉養東朝因心  
之孝至及嗣歷服益見欽為月恒日升廓昭代文明之  
治海涵春煦推聖人博愛之仁至於敦勸農桑不嗜田  
獵每覆奏於庶獄必惻怛於宸衷肇設制科以待天下  
之士特旌死節以勵天下之忠臨御十年始終一德身  
衛斯文而不倦人由其道而莫知充謹持盈諒多遺美  
屬開崇於吉祔用祗薦於鴻名上以惻在天之靈下以  
協造庭之請是諏剛日備舉緼儀謹遣攝太尉某官其  
奉玉冊玉寶上尊謚曰聖文欽孝皇帝廟號仁宗伏冀  
睿靈俯垂歆鑑流光有永錫羨無疆



英宗皇帝謚冊

袁伯長

伏以瑤圖續緒神已御於鼎湖玉冊揚休禮宜陞于太室悼降年之不永儼立政以如新爰述徽猷以傳信以欽惟大行皇帝文明天縱剛健日嚴辨奸邪於嗣位之初彤庭祗畏廣儀注於熙朝之際清廟肅雝絕封禪以社稷人申憲章以勵多士罰茲無赦令必惟行軍臨三載而有成知周萬物而莫隱豈運逢艱否大命靡終然號謹追崇尊名是著謹遣攝太尉某官某奉玉冊王寶上尊號曰睿聖文孝皇帝廟號英宗伏惟炳靈有赫歆格無違祔于新宮以妥以宜

明宗皇帝謚冊

虞伯生

臣聞統必有宗生嘗得以致其讓廟必有主歿思所以尊其名稽古考文宜天錫誅欽惟先皇帝夙秉勇智惟

時元良體傳次之成言避謳歌而述出雖身居絕域多歷於歲年而意動遠人樂為之先後德威孔著未堪大業之艱貞事變匪常猶閔生靈而慎動庶來蘇於僕戴爰戡定以奉迎已謹清宮俄虛黃屋臣民寡祐永遺惠澤之敷施天日有臨尚想神明之如在禮嚴升祔誠備顯揚謹遣攝太尉某官某奉玉冊王寶上尊謚曰翼獻景孝皇帝廟號明宗伏冀睿慈俯回歆假克綏丕祚垂裕無疆

文翰類選大成卷第四百十



文獻備考卷之四十一

卷之四十一



